

ROM

Pol Rom Biynimb Kuyip Minj Tikak. Minim Nind Niņep

Baybol buk day “Rom” apun biy, binak Pol, biynimb Jiysis ker mindiy dawin yomb Rom mindyngipay gok kuyip tikak. Biynimb kun okok minim tep yand niņbiyn ar ak maņgiysek aņņirep gen niņiy, Krays nup chingrep giyan aņgiy tikak.

Minim Ar Keykey Mindip Rek:

Pol minim nind aņgak ak sek, Gor Ñinuk nup yokningayn aņgak minim tep ak sek mindip, chapta 1:1-17.

Biynimb maņgiysek tap siy tap timey gipay rek, Gor kuyip simb niņiy tunğasik dek nep kim amniņgiy rek ayip minim ak mindip, chapta 1:18-3:20.

Jiysis chinup aņgiy kumak rek, nup gosimb niņem nep; Gor nimbip biynimb suņ-tep yand aņgiy diniņgamb aņgak minim ak mindip, chapta 3:21-4:25.

Gor gek biynimb nuk kim kisenimb mind-pun gok, yergiy nup chingrep giy mindeniņgambun minim ak mindip, chapta 5:1-8:39.

Gor miņiy Yisrel kuyip kirgip ak pen, kisen diniņ niņayak rek kuyip diniņgamb minim ak mindip, chapta 9:1-11:36.

Krays ker mindpun rek, miņ nup tep ginimun

ar ak nep ginjun angak minim ak mindip,
 chapta 12:1–15:13.

Pol minim ang jiwning angak minim ak mindip,
 chapta 15:14–16:27.

Pol Rom Biynimb Kuyip Minj Tikak

¹ Yand Pol. Gor yip diy angek, Krays Jiysis nup wonj ak giy, minim tep kuyip apiyminay ak dand tapiyn. ²⁻³ Pen minim tep kun ak, Gor wosrey, bi minim nup angep gok kuyip angek, Baybol buk ak tikiy angyak, “Kisen Depiyt tikek, tik dand amiy tikningambay Bi bap, biynimb di Nop Gor yip jimñiy ayingamb angyak.” Minim nind angyi tikiyak kun ak, angyak rek nep gip. Bi angyak kun ak; Gor Ñinuk Biyomb chin Jiysis Krays nup nep angyak. Nuk lum biy awak rek, Depiyt kiñin ak tik dand amiy nup tikiyak. ⁴ Pen nup ñangayey kumiy tikjakak rek ninbun. Gor Kawnan tep anep gek tikjakak ak mey, nuk Gor Ñinuk yipund giy yimb ak mindip.

⁵ Pen biynimb kunaynep Gor nup yimb ak dand araniyan angyi, yip dek, bi minim nup dand amemb ak mindiy, biynimb miñmon okok kuyip, minim tep nup ak angñen, nup gosimb niñiy, anqip rek gipay. ⁶ Nimbip Rom kay, Gor gos nuk key niñiy dip gok, kunep Jiysis Krays ker mindiy, anqip rek gipim.

⁷ Kun ak Gor nimbip biynimb yand mindeyan angyi diy wasemb yimb ayip gok, nimbip minj tiksiyiyn. Yip tep gip ak; Gor apiyminay nimbip simb niñiy kond minder, mindrep yimb giningambim.

Pol Rom Amniyn Anġiy Gos Niġak

⁸ Minim nind anġniġ gispiyn ak; biynimb pis pis okok nimbip kesim diy apay, “Kiyk Gor nup gosimb niġbay apay.” Yand gos kun ak niġiy, Jiysis Krays bi nambnimb ak mindakniġ, Gor nup anġniġiy, “Tep gipan” apiyn. ⁹ Yand nimbip nen anġiy, per Gor nup anġniġbiyn. Yesek ma apiyn; Gor yip niġimb. Woġg nup ak giñiyiġg, Niñuk nup minim tep ak dand tanġyiġg, ¹⁰ nimbip am niġiyn anġiy, Gor nup per anġniġbiyn. Kun ak, yip yaw anġiy kinjeġ yomek, mindpim ak niniġgayn.

¹¹ Pen yip tep gip ak, am nimbip anġrep gen, Gor nup gosimb ak niġrep giniġgambim. ¹² Pen ar kun anep mer; miñ ar yand gipiyn ak nimb niġem, nimb gipim ar ak yand niġiy, Gor nup chiġgrop giy mey, mindrep giniġgambun.

¹³ Mam ay sikop. Yand miñmon wikan gunap amiy, Gor minim tep ak anġñen, apiyn rek niġiy nup dipay. Kun ak rek, biynimb nimbip gok kunep anġen nup diyaġ anġiy, per niniġg gipiyn ak pen; woġg gunap mindek ma nimbiyn.

¹⁴ Pen Krays yip dek, binuk mindiy gos niġbiyn ak; Griyk biynimb gok, Griyk mer gok, biynimb minim kil niġbay gok, minim kil ma niġbay gok kuyip maġiysek, minim tep nup ak anġñiyn anġiy niġbiyn. ¹⁵ Nimbip Rom mindpim gok kunep, anġñiyn anġiy, gos bap niġbiyn. ¹⁶ Krays minim tep ak, anġñiyiġg nambiġ ma diniġgayn anġiy; monmon anġñimbiyn. Minim kun ak kind yimb anġiy mindip; biynimb niġiy dipay gok, Gor kuyip dek perper mindeniġgambay. Jiwda biynimb gok kuyip perper mindeniġgiy anġiy di

dand amiy, miñiy biynimb Jiwda mer gok kunep disap. ¹⁷ Minim ar kun ak, Jiysis chinup ker kumak angyi, gos niñyinq gon amek mey; Gor chinup niñek biynimb suñ-tep nuk mindpun. Ar kun anep, Baybol buk ak tikiy angyak, “Biynimb perper mindeniñgambay gok, Gor nup gosimb niñbay rek, perper mindeniñgambay angyak.”

Biynimb Gor Nup Ma Dipay Gok Minim Yomb Mindip

¹⁸ Pen biynimb gos timey niñiy, tap timey gipay gok, Gor nup gosimb ak kirgiy mey, minim tep nup ak tawyiw giyiñg rek mindpay. Gipay kun ak, Gor Biyomb semb biyoñ ak niñek, minim yomb mindip. ¹⁹⁻²⁰ Kiyk nup ma niñbun angyi, alemb alemb ñiniñgambay ak pen; nuk Biyomb mankumb biy alwol gay, tap okok mangiysek yimb gayak. Pen nuk tap gayak kun gok niñiy, Bi tap alwol gayak kun ak Biyomb perper mindip angyi niñniñgiy ak pen; kiyk nup ma niñbun apay. Apay kun ak, Biyomb ak niñek, kinjeñ kiyk bap ma mindip. ²¹ Nup niñbay ak pen; niñey Gor rek ma ayek, yimb nup ak ma dand aranimbay. Gos monmon okok niñiy, sakiy sek ay, kisyim wip namb okok rek mindpay. ²² Pen kiyk biynimb gos niñep mindpun angyi anñ mindiy, sakiy ayek, ²³ Gor Biyomb perper mindip ak nup kirgiy; tap yikop gunap diy biynimb rek gay, kimin yakir rek gay, siyñ saraw rek gay, tap kun gok gor chin angyi, anñniñbay. ²⁴ Kun gey, Gor kuyip kirgek, tap siy tap timey mindmangyi kuyip lim gip ar ak giy, kiyk key timey gipay.

²⁵ Biyomb tap okok maŋgiysek gayak ak nup, yimb dand araniŋgiy rek mindakniŋ, minim tep nup ak kirgiy, minim yesek ar ak diy, tap nuk gayak gok, gor chin aŋgiy, aŋgniŋbay.

²⁶ Kun gey gey, Gor kuyip yepyek, tap nambin gip ar ak nep gipay. Biyn gok, bi yipund giy diy mindeniŋgiy ak kirgiy, biyn gunap yip miŋ timey ar gunap gipay. ²⁷ Bi gok kunep; biyn yipund giy diy mindeniŋgiy ak kirgiy, bi gunap kuyip niŋey mon rek yinek, bi gok kiyk keynep, timey yimb gipay. Gipay kun ak, yiwur diniŋgambay.

²⁸ Gor nup gosimb ak ma niŋjun aŋgiy kirgey, kuyip yepyek, tap timey kuyip mindmaŋgiy lim gip gok nep gipay. ²⁹ Pen kuyip tap timey gep ar ak gos nokom ayek, tap okok chin nep minden aŋgiy gos ak niŋyiŋ, monmon giyiŋ, timey giyiŋ mindrep ma yimb gipay. Miluk niŋiy, penpen giy, mimuŋ niŋiy, minim yesek aŋgiy, biynimb pik ay gipay. Pen nip aŋgip yip aŋgip aŋgiy, ³⁰ biynimb aŋgiwiŋ, Gor nup miluk niŋiy, biynimb aŋg sikoy giy, chinup nep niŋyan aŋgiy, yimb kiyk ak key dand aranimbay. Gos kisenimb ar gunap niŋiy timey ginjun aŋgiy, gos ak nep niŋbay. Nop nonim sikop minim apay ak, ma niŋiy alemb alemb ñimbay. ³¹ Kuyip gos timund ma ayek, minim aŋgaypay ak kindik ma gipay. Biynimb kiyk key gok niŋey kuyip, simb ma gip. ³² Gipay kun ak, Gor kuyip yiwur yomb ñiniŋgamb ak niŋbay ak pen; kiyk key monmon gi dand amiy, biynimb gunap kuyip nembnemb gey, kunep gipay.

2

Gor Kor Nuk Ak Yipund Giy Nep Giningamb

¹ Nimb biynimb gunap kuyip anjjiwi, yenen tap siy tap timey gipay apim ak pen; key kunep gipim ak, Gor niñek kinjeñ nimb bap ma mindip.

² Gor bi minim niñind nep anjgi kor gip ak; biynimb timey gipay gok niñek, minim yomb yimb ak mindip. ³ Pen nimb kunep giying, kuyip nep anjjiwpim ak, gos yerip niñbim? Gor chinup kor ma giningamb anjgi niñbim? ⁴ Akan; Gor bi tep biynimb simb niñiy dip ak, nimbip per kond mindek, nup niñem bi yikop bap rek ayek, tap siy tap timey gok ginep mindpim?

⁵⁻⁶ Pen gos kisenimb ar ak niñun anjgi ma niñbim. Nup alemb alemb ñiy, tap timey gok nep gi mindpim ak, miñ saw mon saw rek, ar koyon koyon yiw gip. Biynimb giningambay giningambay rek niñiy, kor giningamb ñin ak, tap timey gipim gok manjgiysek misen angyikiy, yiwur yomb yimb ñiningamb. ⁷ Pen biynimb mumbwak kisenimb ak diy, perper mindon anjgi mindrep giy gey amjap gok kuyip gek, nuk yip perper mindeningambay. ⁸ Pen minim nup ak kirgiy, gosimb nup ma niñiy, mumbwak kiyk key anep gos niñningambay gok, kuyip miluk niñiy, yiwur yomb yimb ak ñiningamb.

⁹ Pen Jiwda biynimb gok sek, Jiwda biynimb mer gok sek timey ar ak geningambay, kuyip angek am kosyam mindiy, gospar yimb aying mindeningambay. ¹⁰ Pen mindrep gey, Gor miñmon biyon kuyip wasemb yimb ayek, nuk yip mindrep yimb giningambay. ¹¹ Kun ak nuk, pis

bap akan pis bap ma amningamb; yipund giy nep ninjy, biynimb gok kuyip tunjasik keykey ayningamb.

¹² Biynimb Gor low minim nind ma ninjy, tap siy tap timey giningambay gok, kor ar ak key giy miñmon timey amningambay; biynimb Gor low ak ninjy, tap siy tap timey giningambay gok, kor ar ak key giy, miñmon timey amningambay.

¹³ Pen biynimb low minim nup ak ninjy anjip rek gipay gok nep, “Biynimb sunrep yand angingamb.” Biynimb low minim nup ak ninjy, minim nep anj anj, won ak kirpay gok kuyip, “Biynimb yand” ma angingamb.

¹⁴ Biynimb Gor low minim ak ninjy mer; mindrep gun anjy, tap siy tap timey kunay ma gipay gok, Gor kuyip gos tep ñek mey kun gipay. ¹⁵ Gipay kun ak, ñin gunap gi dand amiy, namb kiyk biyan, tep gispun anjy ninbay; ñin gunap gi dand amiy, timey gispun anjy ninbay.

¹⁶ Pen Gor Jiysis Krays nup angek kor giningamb ñin ak, tap siy tap timey gi weygipay gok angyikning, gos ninbay kun ak rek kuyip kor gek, yiwur yomb yimb ak diningambay. Pen yand minim tep nup ak angni tangying, per kun ak rek apiyn.

*Chin Jiwda Kay Low Minim Ninbun Rek, Sun-
tep Mindpun Anjyak*

¹⁷ Pen nimb Jiwda biynimb gok, yimb nimbik ak key dand aranying apim, “Chin Gor low minim ninrep gipun ak, biynimb nuk yimb mindpun.

¹⁸ Ñapan sikoy ming mindiy, chinup per Gor low minim ak angneey, nup tep gip ar ak, tep ma

gip ar ak anġiy niġiy, nup tep gip ar anep gipun apim.”¹⁹ Pen minim ar bap apim, “Biynimb ma niġbay gok kuyip anġñirep giy, windin koy kisyim wip rek mindpay gok kuyip anġñirep giy,²⁰ low minim ma niġbay gok kuyip anġñirep giy, ñapan sikoy gok kuyip anġñirep giy gipun apim.” Apim kun ak, “Low minim niġbun rek, minim tep bap ma niġbun mer; maŋgiysek niġdipun anep mindip apim.”

²¹ Nimb low minim ak niġiy, biynimb okok kuyip anġñimbim ak pen; nimb key low ar kun gok timbrikipim! “Tap ma siy dinimimb apim” ak pen; nimb key siy dipim. ²² Biyn siy bi siy ma ginimimb apim ak pen; nimb key biyn siy bi siy gipim. “Tap monmon okok gor rek ma anġniġnimimb apim” ak pen; nimb korip anġniġbay miŋgan ak amiy, tap daypay gok gunap siy dipim.

²³ Yimb nimbik ak key dand araniy apim, “Chin Gor low ak niġrep yimb gipun apim” ak pen; minim nup ak timbrikipim rek, yimb nup taw achip achip gipim. ²⁴ Kun ak mindrep ma giy, Mosis Baybol buk ak tikiy anġak rek nep gipim. Nuk anġak:

“Nimb Jiwda biynimb, Gor low minim niġbun apim ak pen; nimb key mindrep ma gipim rek, biynimb yikop gok Gor nup anġjiwpay anġak.”

²⁵ Chin Jiwda biynimb gok, Gor biynimb nuk mindon anġiy, ñi gok tikying, per kumbak tikpun. Pen Gor minim nup ak timbrikiy, key niġniġgambun rek giniġgambun ak; biynimb

yikop okok nimb, Gor nup gosimb ma niñbay rek ak mindoningambun. ²⁶ Kun ak rek biynimb kumbak ma tikpay gok, minim angip rek geniñgambay, kuyip kunep direp giniñgamb.

²⁷ Chin Jiwda kay Baybol buk niñyiq, kumbak tikyiq gipun ak pen; monmon gipun rek, biynimb yikop gok mindrep giyakniñ, chin kuyip niñon nambiñ giniñgamb.

²⁸ Kumbak tikiy, “Chin Gor biynimb nuk yipund giy yimb apun” ak pen; biynimb nuk ma mindpun. ²⁹ Biynimb nuk mindpay gok, Gor Kawnan ak gos ñek, nup gosimb niñiy angip rek gipay. Gipay kun ak, biynimb niñey yimb ma mindip; pen Gor niñek yimb mindip.

3

Gor Yipund Giy Nep Kor Giniñgamb

¹⁻² Kun apiyn ak, nimb Jiwda kay angniñgambim, “Biynimb yikop kumbak ma tikpay rek mindey tep gipkop angiy asap angniñgambim” ak pen; ar kun ak ma apiyn. Jiwda biynimb mindpun ak tep yimb mindpun. Gor minim nuk ak biynimb gunap kuyip angñiniñgiy angiy, chinup Jiwda biynimb kind okok ken yiq tik ayek mindip. ³ Jiwda biynimb gunap gos kiyk key niñbay rek, timey gi dand amey amey, Gor minim tep nuk niñind angak ak kurginiñgamb? ⁴ Mer yimb! Biynimb gok mañgiysek ñin gunap yesek angniñgambay; Gor nuk niñind yimb angiy, angip rek gip. Minim kun ak rek Baybol buk ak tikiy angyak:

“Gor. Nand minim yipund giy nep apan ak, nip minim gunap pen angningiy rek ma ayip. Nip kor gining, kor giningiy minim kiñin bap ma mindeningamb angyak.”

⁵ Pen nimb angningambim, “Chin minek minek timey gipun rek, biynimb gunap Gor yipund giy nep gip ak misen niniy, yimb nup dand araningambay ak, chinup yenen kor giningamb angningambim.” Pen minim kun ak, biynimb niniy apay rek nep angningambim. ⁶ Gor bi sun-
tep biynimb mangiysek kor niningamb ak, pis bap akan, pis bap ma amningamb; yipund giy ar ak nep angningamb.

⁷ Pen nimb gunap angningambim, “Chin yesek ar ak gon, biynimb gunap niniy tungandikiy, Gor yipund giy nep gip ar ak ninrep giy, yimb nup dand araningambay. Kun ak yenen Gor chinup kor giy, yiwur yomb ñiningamb angningambim.”

⁸ Minim yesek kun ak rek angyi angningambim, “Tap siy tap timey anep gon gon; Gor minim tep ak, ap ar kun ak jimñiningamb angningambim.” Pen biynimb gunap yip angjwiying, “Pol minim kun ak rek angyi apay.” Minim kun ak rek yand ma apiyn! Tom gipay rek, Gor kuyip ninind yiwur yomb ñiningamb.

Biynimb Tep Bap Ma Mindpun

⁹ Kun ak yerip angyun? “Gor ninjek, chin Jiwda biynimb gok mindrep gipun; biynimb yikop gok mindrep ma gipay angyun?” Mer! Mey apiyn rek. Nuk ninimb; chin mangiysek timey gipun.

¹⁰ Minim kun ak rek, Baybol buk ak tikiy angyak;

“Biynimb tep Gor kuyip dep rek gunap ma mindpay. Mer yimb! ¹¹ Biynimb gos niñrep gipay gunap ma mindpay. Biynimb ‘Gor nup chingun angyi’ niñbay gunap ma mindpay. ¹² Biynimb gok bap mindrep ma gipay. Mañgysek Gor nup kirgiy, mindrep ma giy, timey yimb nep gipay. ¹³⁻¹⁴ Alemb kiyk ak andik mandik giy per tom yimb nep apay ak; jonjimb kiyk ak, chip komiy yiw girep ma gey, kuyrimey wip rek ak mindip. Pen biynimb angyiwiy, miluk niñiy kunj timey giy gipay ak; ñom timey kondkol rek ak mindpay. ¹⁵ Kalrimey yimb jiwiy, biynimb pik ayep gos anep niñiy, ¹⁶ biynimb gok kuyip per timey gey, gos kuñay yimb nep niñbay. ¹⁷ Biynimb gok yip, kapkap jimñiy mind tep giniñgiy rek ma ayip. ¹⁸ Gor Biyomb ak niñmindip angyi, ma pirikpay angyak.”

¹⁹ Gor angek tikyak kun ak, biynimb gunap kuyip ma tikyak, chinup Jiwda biynimb per minim nup riyt giy niñbun gok tikyak. Kun ak mind tep gipun angyi ma angningambun. Biynimb miñmon okok mañgysek timey yimb gon, Gor niñek kor gep rek nokom mindip. ²⁰ Kun ak, chin Gor low minim ak niñiy mind tep gon, biynimb suñrep yand gok angyi niñnimuñ rek ma ayip. Pen Gor low ak niñiy niñbun: chin biynimb tap siy tap timey gep gok mañgysek mindpun.

Krays Nup Gosimb Niñey Mey, Biynimb Suñ-tep Yand Angip

21-22 Kun ak pen Mosis bi gok giniᅅgamb aᅅgiy tikiy aᅅgyak rek, Jiysis Krays chinup ker kumimb ak mey; nup gosimb niᅅon, Gor chinup biynimb suᅅrep yand mindpim aᅅgniᅅgamb. Pen chin Jiwda biynimb gok sek, biynimb Jiwda mer gok sek low ar anep niᅅiy gon, kun ma aᅅgniᅅgamb.

23 Biynimb mindrep yimb gipay gunap ma mindpay; maᅅgiyseᅅ tap siy tap timey gipun ak, miᅅmon tep chinup aᅅgayip ak amiy, nund yip mindenjun rek ma ayek, 24 Gor chinup simb niᅅiy, biynimb tep yand gok maᅅgiyseᅅ mindeyan aᅅgiy, Niᅅuk Jiysis Krays nup monmon yokak.

25-26 Gor bi suᅅrep, yipund giy nep gip ak; chin biynimb tap siy tap timey gipun gok, yikop dep rek ma ayak; yiwur niᅅimur rek nep ayak. Pen yiwur kun ak wosrey ma niᅅiy, mind dand amiy, yep namb won siᅅbiy nep niᅅiniᅅ, Niᅅuk Krays Jiysis nup chinup ker aᅅgek apiy, yiwur kun ak dek, biynimb chinup nen kumak aᅅgiy gos niᅅbun gok, Nop Gor biynimb suᅅrep yand gok aᅅgiy dip.

27-28 Kun ak low ar ak gon, chinup dek biynimb nuk mindpun aᅅgiy, yimb chin key dand aran-jun rek ma ayip. Jiysis chinup nen kumak gos ak niᅅiy nep mey, Gor biynimb nuk mindpun. Pen chin nep tom giy aᅅgniᅅgambun, “Low ak niᅅon, biynimb suᅅ-tep yand gok aᅅgniᅅgamb aᅅgniᅅgambun.”

29-30 Kun ak, Gor chinup Jiwda biynimb gok diy; biynimb yikop gok kirgip aᅅgiy, ma aᅅgjun. Biyomb chin kuᅅay mer. Gor nokom ak mey; chinup Jiwda biynimb gok diy, biynimb yikop gok kuyip diy gip. Jiwda biynimb gipay rek, kumbak

tikey ninjy ma dip; chin biynimb an an Jiysis chinup nen kumimb anjy gos niñon, chinup dip.

³¹ Pen Jiysis nup gosimb niñjun apiyn ak; nimb anjningambim, “Low minim ak kirgiyan anjy asap anjningambim.” Kun anjy ma apiyn. Yand apiyn ak; biynimb nup gosimb niñbay gok, anjip rek giyakniñ, low minim ak amrep yimb giningamb anjy apiyn.

4

Gor Ebrahim Nup Bi Suñ-tep Yand Anjak

¹ Chin Jiwda biynimb, basind yes chinup kiñiñ giy tikek, tik dand amiy apiy giy, tikey mindpun ak mey; binak Ebrahim. Pen Gor Ebrahim nup dak ak, ar akay ninjy dak? ² Low minim ak niñrep gek nup, bi suñ-tep anjy dak anjgun? Ak kun ma anjgun. Biynimb low ar ak ninjy gipay gok, mindrep gipun anjy, yimb kiyk key dand araneningambay; Gor niñek tep ma giningamb. ³ Pen Baybol buk ak tikiy angyak, “Ebrahim Gor niñind anjip anjy, nup gosimb niñek mey; bi suñ-tep yand anjy dak angyak.”

⁴ Nuk tap ar bap gek ninjy dembikop ak; tap ar kun ak gamb dip anjy apnup ak pen; nuk Gor nup gosimb niñak rek, nup yikop dak.

⁵ Gor chinup gip miñ ar ak key yimb. Chin biynimb tap siy tap timey giy asiñ mindpun gok yikop dip. Low ar ak niñon, biynimb suñ-tep yand anjy ma dip; chinup simb niñimb rek, nup gosimb niñon, “Biynimb suñ-tep yand gok anjip.”

⁶⁻⁸ Minim aspiyn biy rek, basind yes chin Depiyt kunep, wosrey Baybol buk ak tikiy anjak:

“Biynimb tap siy tap timey giy asiñ mindey, Gor niñiy kirgek, suñ-tep mindpay rek, tep gakniñ mindeniñgambay. Tap siy tap timey giyak minim ak, tip ma añgniñgamb ak niñiy, tep gakniñ mindeniñgambay aňgak.”

⁹ Biynimb tap siy tap timey giy, asiñ mindey, Gor gach kuyip niñiy kirgek, tep gakniñ mindpay aspun kun gok an? Biynimb kumbak tikiy, Jiwda low keykey ar kun gok giyiñg, Jiysis nup gosimb niñbay gok nep akan; biynimb yikop nup gosimb niñbay gok sek? Mey, biynimb yikop gok sesek.

¹⁰ Yenen: Ebrahim, basind chin wosrey yimb ak, kumbak ma tikak ñin ak, Gor nup gosimb niñak rek, nup dek, bi suñ-tep nuk mindyiñgip.

¹¹ Kisen Gor aňgak, “Ebrahim bi yip ker mindip ak, nuk key yimb mindip ak niñyañ aňgiy,” nup aňgak, “Nand bi suñ-tep yand mindpan rek, kumbak tiknimin aňgek,” kumbak tikak. Gor gak kun ak niñbun; biynimb kumbak ma tikpay ak pen; Ebrahim Gor nup gosimb niñak rek, gosimb niñey, Gor kuyip biynimb suñ-tep yand aňgiy dek mey, Ebrahim ñi pañ nuk gok mindpay.

¹² Kiyk nep mer, biynimb kumbak tikpay gok kunep. Ebrahim kumbak ma tikak ñin ak, Gor nup gosimb niñyiñg nep, mindyiñgip rek mindpay gok, Ebrahim ñi pañ nuk mindpay.

¹³ Pen Ebrahim low ar gok niñiy gek, Gor nup bi suñ-tep yand aňgiy ma dak. Nup gosimb niñak rek niñiy, bi suñ-tep yand aňgiy, nup minim aňgay aňgak, “Nand kiñiñ giy gey, biynimb ñi pañ nand kisen mindeniñgambay gok yip, biynimb okok mañgiysekkond mindeniñgambim aňgak.”

¹⁴⁻¹⁵ Gor minim giningayn angyi angyak kun ak, low ar ak ninji giningambay biynimb gok kuyip ma angak; nup gosimb ninjingambay gok kuyip angak. Mer ak, biynimb nup gosimb ninbay gok, yesek angyi nup gosimb ninbay. Pen biynimb low ar ak kindik giy Gor biynimb nuk mindeningambun angyi gos ninbay gok, minim Ebrahim nup giningayn angyi angyak ak ma dinjingambay rek, low minim ak timbrikiy, yiwur yomb dinjingambay.

¹⁶ Kun ak ninbun; Gor minim giningayn angyi angyak kun ak, biynimb Ebrahim Gor nup gosimb ninjak rek ninbay gok kuyip angak. Nuk angyi rek gey ninji ma dip; tap bap gey mer; kuyip yikop simb ninji dip. Pen Ebrahim gak rek gipay biynimb gok dinjing, chinup Jiwda biynimb low angnak gok nep ma dip; nup gosimb ninbay gok kuyip mangyisek dip. ¹⁷ Baybol buk ak tikiy angyak, “Yand aspiyn ak mey, ñi pañ nand kunjay mindiy, miñmon keykey kunaynep mindeningambay angak.” Kun ak Gor nup gosimb ninbun biynimb miñmon okok mangyisek, basind yes Ebrahim ñi pañ nuk yimb mindpun. Gor Biyomb chin kun ak nuk key yimb gip. Biynimb kumemb gok gek tikjakpay; tap gunap “Gañ” angek giningamb.

Ebrahim Gor Nup Gosimb Ninjak Rek Ninjun

¹⁸ Pen Ebrahim ñapan tiknimun rek ma ayek, Gor minim angyi angak, “Nand kiñij giy, biynimb ñi pañ nand kisen mindeningambay gok, kiñij keykey kunay yimb mindeningambim.” Kun angek, Ebrahim ninind angyi angyi, gos sek

mindiy mey, angak rek ñi pañ nuk gok gap rek akan, kamb kilup rek, kuñay yimb nep mindpay.

¹⁹ Pen kiykber ñapan bap ma tikiy; mind dand amiy, Aysek nup Gor angak rek tikrik ñin ak, Sera yip Ebrahim yip, beriyminay giy tokiy yimb ayrik. Ebrahim simiy nuk ñin jiwiy onep kañgol ak amnak ak mey; ñapan tiknimiyr rek ma ayak. Pen Ebrahim angak, ²⁰⁻²¹ “Ak tap yomb mer; Gor Biyomb key yimb ak yip ñapan tikningamban angip ak, niñind angip angiy, Gor nup yimb ak dand aranak.” ²² Ebrahim gak kun ak, Baybol buk ak tikiy angyak, “Ebrahim Gor nup gosimb niñek, bi suñ-tep yand angak.” ²³ Gor kuyip gosimb ñek tikyak kun ak, Ebrahim nep niñnimuñ angiy ma tikyak. ²⁴ Chinup biynimb suñ-tep yand angningamb gok mangiysek niñningiy angiy tikyak. Kun ak chin biynimb Gor nep gek, Jiysis kumiy tip tikjakip angiy niñbun gok angyak. ²⁵ Pen tap siy tap timey giy asiñ mindonuk rek, chinup simb niñiy, Ñinuk Jiysis Krays nup yokek apiy kumak. Kumek tip gek tikjakak rek, asiñ yomb wilikak kun ak, suñ aynimuñ rek ayip.

5

Gor Nup Gosimb Niñon Biynimb Suñ-tep Yand Angningamb

¹⁻² Pen Gor chinup simb niñiy gak kun ak, nup gosimb niñon, chinup dek, biynimb suñ-tep nuk mindpun ak; Gor yip jimñiy mindiy, mind tep yimb gipun. Miñmon chinup angayip ak

amiy, nuk yip mindeningambun angyi, tep gakniñ mindpun.

³⁻⁴ Pen Krays nup chingiy mindon, miker gunap apek apun, “Miker wip rek Krays nup chingrep yimb ginjun angyi,” nup chingrep yimb gambun mey; Gor “Tep gipim angek,” gos sek mindiy, miñmiñ gipun.

⁵ Gor Kawnan nuk ak chinup yokek, namb chinup biyañ key yimb ayek, Gor nup gosimb niñiy, biynimb gok kuyip wasemb ay gipun ak; niñind nup kond mindyng gos sek mindpun.

⁶ Pen chin biynimb man ar biy mindpun gok timey gon gon, Gor yip jimñiy mindep rek ma ayek, miñiy ñiyand yokep ñin ak wip angyi, Ñinuk nup yokek apiy, chinup nen kumak. ⁷ Per biynimb gunap biynimb gunap kuyip nen kumun angyi ma kumbay. Pen ñin nokom nokom biynimb gunap, biynimb tep yimb bap niñiy, chin kuyip nen kumon, kiyk kim amniyañ angyi, kumningambay akañ ma niñbun. ⁸ Pen chin Gor ker ma mindonuk ñin ak, chinup timey gipay angyi niñiy ma kirgak; chinup wasemb yimb ay Ñinuk nup monmon yokek apiy, kumak.

⁹ Kun ak likañ nuk yapek ak, Gor yip jimñiy mindpun rek, kor yomb niñningambay ñin ak, chin suñ-tep nep mindoningambun. ¹⁰ Biynimb ñaņgep nuk mindonuk ñin ak, chinup simb niñiy, Ñinuk nup yokek apiy, chinup di nuk yip jimñiy ayak ak mey, tikjakiy am Nop yip mindip rek, tap bap chinup ginimuñ rek ma ayip! ¹¹ Pen kun ak nep mer; Gor chinup dip ak Krays nep gek dip ak

mey, miñiy kuyipapiy yimb dand aranying, tep gaksiñ mindpun.

Andam Layn Nuk Kumbay; Jiysis Layn Nuk Permindep Dipay

¹² Pen tap siy tap timey giy kumemb ak, Andam kiñiñ giy gek mey, asiñ nuk kun ak biynimb tikayep nuk gok mañgiysek wilikek kumbay. Yenen: Gor niñek, Andam gak kun ak, chin biynimb tikayep nuk gok mañgiysek ginuk. Ñin kun ak chinup ma tikyak ak pen; chin yip ginuk.

¹³ Kun ak mey, tap siy tap timey gep gos ak man ar biy nind mindek; Mosis low minim ak, kisen aṅṅak. Low ak ma niñiy timey gey, Gor niñiy kirginiṅgamb aṅṅiṅgambun ak pen; Andam kumak ak, Gor low minim ak timbrikiy kumak. ¹⁴ Andam kiñiñ giy timey gek, asiñ nuk kun ak biynimb gok kuyip wilikek, mañgiysek kum dand ap ap, Mosis low aṅṅak ñin ak awak. Gunap low ma timbrikyak ak pen; Andam gak rek kumyak. Pen Jiysis mankumb biy apiy kumek mey; biynimb nup gosimb niñbay gok, nuk gak rek tikjakiy, kim mindeniṅgambay.

¹⁵ Bi omiñal kun ak keykey yimb girik. Andam kiñiñ giy tap siy tap timey gek, biynimb nuk kuñaynep kumbay. Gor chinup simb niñiy, Jiysis nup yikop yokek apiy gek mey, biynimb nuk kuñaynep suñ-tep mindiy, perper mindeniṅgambay.

¹⁶ Andam tap siy tap timey nokom yimb ak gek, minim yomb ak awak. Pen Gor chinup simb niñiy, nuk yip di jimñiniñ key yimb gak. Ñinuk Jiysis Krays nup yokek apiy, tap siy tap timey

kuṅay ginuk rek yiwur dek mey, chin kim amjun rek ayak.

¹⁷ Nind bi nokom bap tap siy tap timey gek, asiṅ kilis timey yimb kun ak chinup maṅgiysek wilikip. Pen kisen bi nokom bap key chinup simb niṅak rek, di jimñinim aṅgiy kumek mey, nup chingon, niṅind biynimb suṅ-tep yand yimb gok aṅgiy chinup dek, nup tep gakniṅ yip nep mindeningambun.

¹⁸ Kun ak Andam tap siy tap timey nokom bap gek, biynimb maṅgiysek asiṅ kun ak wilikek, yiwur yomb dipay; Krays ñin nokom bap Nop aṅgak rek niṅdiy gek, biynimb nup chingipay gok, perper mindeningambay. ¹⁹ Bi nokom bap Gor nup minim ak timbrikak rek, biynimb kuṅaynep kuyip asiṅ ayip. Kun ak rek pen Bi nokom bap Nop minim aṅgak rek niṅdiy kumek mey, biynimb kuṅaynep suṅ-tep ayingamb.

²⁰ Pen nind tap siy tap timey giying, yikop gispun aṅgiy gi mindon mey, low minim ak aṅgñak. Aṅgñek, low gok niṅiy, tap siy tap timey gipun ak yenen gipun aṅgiy gos ak niṅon, chinup simb niṅiy dip.

²¹ Asiṅ kun ak kilis yimb; key kim amjun rek ma mindip ak pen; Gor chinup simb niṅimb ak kunep, tap kilis yimb ak mey; mam nind chin Jiy-sis Krays nup yokek apiy kumiy tikjakak ak mey, biynimb nup chingipun gok kim amningambun.

6

*“Jiysis Yip Kumiy Kum Sakiy Ginuk Aṅgiy,”
Timey Gep Gos Ar Ak Ma Niṅjun*

¹ Gor chinup simb niñimb kun ak, biynimb gunap angningambay, “Tap siy tap timey monmon giying mindon, Gor niñiy kirgakniñ, yimb nup aranañ angningambay.” ² Pen minim yesek kun ak rek chin ma anjgun. Tap siy tap timey giy mey, Jiysis yip kumnuk. Miñiy nup ker mindpun ak, ar kun ak ker ma mindpun. ³ Nimb niñbim; chin biynimb Krays Jiysis yip jimñiy mindonjun angyi ñing pikpun gok, “Nuk kumak rek jimñiy kumnuk angyi,” ñing pikpun. ⁴ Pen Krays kumek, kamb miñgan ak komey, Nop biyomb key yimb ak gek, tip tikjakiy kim mindip rek; chinup kunep gek, kim kisenimb mindpun.

⁵ Kun ak, Krays yip jimñiy kumnuk rek ayip biynimb gok, nuk tip ak tikjakiy kim mindip rek, chin kunep tikjakiy kim mindeningambun. ⁶ Chin niñbun; miñ timey giyingipun ak, Krays mon kiros bak biyoñ kumek pungrikak ak mey, miñ ar kun ak kirgiy mind tep giningambun. ⁷ Biynimb kum sakiy gipay gok, tap timey gep gos ak ma ayip.

⁸ Krays yip kumnuk angyi niñbun biynimb gok, nuk yip kim mindeningambun ak kunep niñbun. ⁹ Nop gek tikjakak rek, tip ak ma kumningamb, per mindeningamb. ¹⁰ Tap siy tap timey gon gon, minek nokom yimb kumiy, tip ak tikjakiy am Nop yip mindpiyr.

¹¹ Kun ak mey, Krays Jiysis yip wilikiy, tap siy tap timey gep ar ak kum sakiy gipun angyi, gos tumind nimb ak mañgiysek Gor ker amnimuñ. ¹² Mer ak, gos timey nimb ak, nimbip tiwning dand amningamb tap siy tap timey gep ar ak. ¹³ Pen gos timey nimb ak, mumbwak nimbip gok

lipiņg dand amek tap siy tap timey ma ginimimb. Jiysis yip kumiy tikjakpun rek ayip ak niņiy, Gor nup direp ginjun aņgiy, gos tumind nimb ak maņgiyseker nup ker amnimuņ.

¹⁴ Nind low minim ar ak niņiy gun aņgiy gi dand amiy, tap siy tap timey gep gos anep ayek giyiņgipim. Pen miņiy kun ak ker ma mindpim. Gor nimbip simb niņiy dek, Krays biynimb nuk mindpim ak; nup chiņgiy mey, tap siy tap timey gok kirginiņgambim.

Suņ Mindpun Rek, Suņ-tep Ar Anep Gon Amnimuņ

¹⁵ Pen Gor low ar ak gon niņiy chinup ma diniņgamb; nuk key chinup simb niņiy, Krays nup yokek apiy, chinup aņgiy kumak rek diniņgamb ak; tap siy tap timey ginep mindonjun? Mer! Kun ma ginjun. ¹⁶ Kun gon, gos yomb chin ak, ar kun ak amek, ar kun ak giy, kumniņgambun. Pen Gor aņgip rek gun aņgiy gon amek mey; nuk gek suņ-tep mindeniņgambun.

¹⁷⁻¹⁸ Nind nimbip tap siy tap timey gep gos anep ayek, ar kun ak giyiņgipim ak pen; kisen Gor minim ak niņiy dipik ak mey; Gor nup tep apiyn. ¹⁹ Pen nimb key kilis ma mindpim rek, aņgrepen, niņrep gim aņgiy aspiyn.

Nind gos timund nimbip ak tiwning dand amek, tap siy tap timey gi dand amiy, timey yimb nep giyiņgipim. Pen miņiy Jiysis yip mindpim rek, gos timund nimbip ak tiwning dand amnimuņ, Gor nup tep giniņgamb ar ak nep. ²⁰ Nind tap siy tap timey ar ak giy, Gor nup tep gip ar ak ma yimb giyiņgipim. ²¹ Pen giyiņgipim kun ak, miņiy niņiy

apim, “Tap yerip tep ak diy, per kun giyngipun apim.” Biynimb kun gipay gok, miñmon timey ak amiy, yiwur yomb ak per dipay.

²² Pen Gor gek, tap asiñ kun gok kirgiy, nup ker mindpim ak; biynimb suñ-tep gok mindiy, perper nep mindeningambim. ²³ Yenen: tap siy tap timey gep ar ak giy, yiwur yomb diningambay; pen Jiysis Krays Biyomb chinup tungasik dak ak nup diy, perper nep mindeningambay.

7

Low Minim Ak Kirgiy, Bi Kumiy Tikjakak Anup Dinjun

¹ Nimb mam ay low minim angey niñbim gok. Chin Krays yip kumnuk rek ayip biynimb gok, minim ar gunap angning gispiyn. Nimb niñbim; biynimb kim mindyakniñ, kuyip low minim niñnimimb angningambay ak pen; kumeningambay miker kuyip gunap ma mindeningamb.

²⁻³ Minim bak kun okok rek bap mindip. Biyn ak nuñgumiy mindakniñ, am bi kisenimb bap niñiy deningamb, nup angningambay, “Low timbrikpan” angningambay. Pen nuñgumiy kumek, am bi kisenimb niñiy diningamb ak, minim ma mindip; “Low timbrikpan angyi,” ma angningambay.

⁴ Kun ak rek nimb mam ay Krays nup wilikiy mindpim gok, nuk yip kumbik rek, low minim chichiy diyngipim ak kirgiy, bi kumiy tikjakak anup chichiy dipim ak mey; miñiy Gor nup tep ginimun ar ak ginimimb rek ayip.

⁵ Nind Krays nup ma dinuk ñin ak, low minim ar anep kindik ginjun angyi mindyinjipun ak pen; gos timey pang ayek mindrep ma giy, Gor yip mindep rek ma ayak. ⁶ Pen miñiy Krays yip kumiy tikjakiy mindpun rek ayip ak, Jiwda low minim tikyak ar ak ninjiy ma gipun; Gor Kawnan gos ñimb ar ak ninjiy gipun.

Low Mindip Rek, Tap Siy Tap Timey Gipun Ak Angyi Ninbun

⁷ Kun ak yerip angyun? Gor low minim angek angyak ak, minim timey angyip angyun? Mer! Ak kun ma angyun.

Nind bi asiñ mindenik ak ma ninjik. Pen low minim ak ninjiy, Gor nup tep gip ar ak, tep ma gip ar ak angyi ninrep ginik. Low minim ar bap tikiy angyak, “Biynimb gunap tap kuyip gok, yip rek mindombikop angyi gos ak ma ninnimimb angyey,” gos kun ak ninjik rek, bi asiñ mindenik ak ninrep ginik. Yikop ak ma ninbinip. ⁸ Gor low minim ak tep ak pen; yand bi timey mindpiyn rek, gos timund yip ak per lipiñ dand amimb, tap siy tap timey gep ar ak. Pen low ak mindamb mey, tap siy tap timey magep angyi ninbun.

⁹ Yand nind ma ninjiy, mind tep gipiyn angnik. Pen kisen low minim kun ak angyeyak, Gor yip jimñiy ma mindpiyn; tap siy tap timey giy, ¹⁰ bi pisnep kumemb rek ak mindpiyn angyi ninjik.

Kun ak low minim ak kindik giy, perper mindonjun rek ayip ak pen; yip angyey ninen, tap siy tap timey ginik rek, kumiy Gor yip perper mindenim rek ma ayak. ¹¹ Gor low nuk ak tep ak pen; yand bi tap siy tap timey gep ak, ar kun

ak giy perper mindeningayn anġiy, gi dand amiy, Gor yip jimñiy mindep rek ma ayak; miker yomb dinim rek ayak.

¹² Kun ak chin niġbun; Gor low minim ak tep mindip. Minim nuk yerip yerip anġak ar ak kunep, minim tep yipund giy nep mindip ak mey; ¹³ Gor low minim tep ak anġey niġbun rek, miker yomb ak ma dingingambun; tap siy tap timey gipun rek, miker yomb kun ak dingingambun. Pen nuk chinup low ayak kun ak, gos bap key niġiy ma ayak; tap siy tap timey gipun gach yomb sikerek mindip ak, niġningiy anġiy ayak.

Tap Ma Gun Apun Gok Nep Gipun

¹⁴ Chin niġbun; low minim ak Gor Kawnan ak gos ñek tikyak ak pen; gos timund yip ak per amimb tap siy tap timey gep ar ak. ¹⁵ Kun ak mey, tap tep giyn anġiy niġbiyn ar ak ma gipiyn; tap timey ma giyn anġiy niġbiyn ar anep gipiyn. Pen yenen kun gipiyn ak ma niġbiyn. ¹⁶ Kun ak low ak tep mindip anġiy niġbiyn rek, yiruk gakniġ, tap siy tap timey gok gipiyn.

¹⁷ Yand key timey giyn anġiy, ma gipiyn; pen bi tep ma mindpiyn rek, gos timey ak key namb yip biyan paŋg ayek mey, tap siy tap timey kun gok gipiyn. ¹⁸ Yand niġbiyn; namb yip akyan mind tep ma gip. Gor low ar ak giyn anġiy, gi dand amiy ma gipiyn; ¹⁹ tap ma giyn anġiy niġbiyn ar ak gipiyn. ²⁰ Yip gip kun ak, Andam yip yiġ ñak rek mey kun gip.

²¹ Kun ak, tep ar ak giyn anġiy, per timey ar ak nep gipiyn. ²² Yip tep gip, Gor low tep ar ak pen;

²³ mumbwak yand ak yip tiwning dand amimb tap siy tap timey gep ar ak.

²⁴ Yip kun gek gek, kumiy am Gor yip ma mindenim rek ayip ak, an yip gek mind tep giningayn? ²⁵ Biyomb chin Jiysis Krays nep! Gor nup “Tep” apiyn!

Pen minim apiyn biy, kun giy mindip: gos yand amimb Gor nup ak pen; bi tep ma mindpiyn rek, tap siy tap timey gok gipiyn.

8

Gor Kawnan Ak Gos Ñakniñ Gi Dand Amiy Mey Perper Mindoningambun

¹⁻² Pen chin Jiysis Krays biynimb nuk mindpun gok, Gor Kawnan ak gos ñakniñ gon amek mey, tap siy tap timey giy kumbay ar ak kirpun. Krays yip mindpun kun ak, Gor chinup kor ma giningamb. ³ Pen biynimb tep ma mindpun rek, Gor low ar ak gi dand amiy, mind tep ginjun rek ma ayek, Ñinuk key tap siy tap timey ma gip ak chinup nen angyi, yokek apiy kumak. ⁴ Chinup nen kumak rek, Gor Kawnan gos ñimb ar anep giying, gos timey wip ar ak kirginingambun. Pen nuk gos ñakniñ, gi dand amying, low minim gunap ma timbrikningambun.

⁵⁻⁶ Biynimb gos timey apek, ar kun ak gey amimb gok kumiy, am Gor yip ma mindeningambay. Pen biynimb Gor Kawnan gos ñek gey amimb gok, Gor nup tep giningamb ar anep gun angyi, gipay ak mey; Gor yip jimñiy mindiy, mindrep giningambay.

⁷ Biynimb gos kiyk keynep niñiy gipay gok, Gor yip jimñiy ma mindpay. Kiyk biynimb nuk ma mindiy, aᅅgip rek ma yimb gipay. ⁸ Biynimb kun gok mindrep gey, nup tep ginimuj rek ma ayip.

⁹ Pen nimb biynimb Gor Kawnan bak ayek yip mindpim gok, gos key niñbim ar ak ma gipim; Gor Kawnan gos ñimb ar ak gipim. Biynimb Krays Kawnan yip ma mindpay gok, nup ker ma mindpay. ¹⁰ Pen gos timund nindnimb ak nuk yip kumek, suᅅ-tep mindpim rek, gos yomb nimb ak amimb; Gor Kawnan gos ñimb ar ak. ¹¹ Gor Ñinuk Krays nup gek tip tikjakak Kawnan ak dipim ak mey; nimbip kunep gek kim kisenimb ay, am nuk yip perper mindeniᅅgambim.

¹² Kun ak mam ay sikop. Chin yerginjun? Gos chinup ak key wip rek ginjun? Ak mer! ¹³ Ar kun ak gon amek, kumiy am Gor yip ma mindeniᅅgambun. Pen Gor Kawnan ak gos ñakniᅅ gon amek mey, Gor yip nep mindoniᅅgambun.

¹⁴ Chin niñbun: chin biynimb Gor Kawnan gos ñakniᅅ girapun gok, ñapan nuk yimb mindpun. ¹⁵⁻¹⁶ Kun ak nind pirikyiniᅅgipun rek, Gor Kawnan ak chinup gos yerip rek ñiniᅅgamb aᅅgiy, jep diy, biynimb yikop woᅅg giñemb rek ak ma mindonjun. Yenen; Kawnan nuk ak chin yip mindiy, gos ñakniᅅ, ñapan nuk mindpun ak niñrep giy, nup “Bapiy! Bapiy!” apun.

¹⁷ Kun ak ñapan nuk mindpun ak mey; Ñinuk Krays nup direp gip rek, chinup kunep giniᅅgamb. Pen Krays nup aᅅgjiwiy timey giyak rek, chinup kunep timey giniᅅgamb gey ma pirikiy,

Krays nup sakiy ma goniᅅgambun; Ñinuk nup direp gak rek, chinup kunep giniᅅgamb.

Kisen Mindrep Giniᅅgambun

¹⁸ Yand niᅅen: Krays nup chingiy mindon miker gunap giniᅅgamb ak, minim ma mindip. Ak yikop giniᅅgamb. Am nuk yip mindrep giniᅅgambun ñin ak, tep yimb giniᅅgamb.

¹⁹⁻²⁰ Tap gayak okok maᅅiysek, miᅅiy mindrep ginimuᅅ rek ma ayip. Gip kun ak, Gor giniᅅgamb aᅅgak rek nep gip. Nuk aᅅgak, “Tap gaynik gok gen, mindrep ma giy, gi dam dam kisen tip ak gen, mindrep giniᅅgamb aᅅgak.” ²¹ Tap gayak kun gok, nind mindrep ma giniᅅgamb. Chinup biynimb gok gek ñapan nuk yimb ay, nuk yip mind tep giniᅅgambun ñin ak nep; tap yikop kun gok gek mindrep giniᅅgamb.

²² Chin niᅅbun: tap Gor gayak kun gok maᅅiysek mindrep giniᅅgamb ak pen; miᅅiy ñin biy, biyn ñapan tikniᅅ gey yiwur gip rek ak gi mindip. ²³ Pen nuk chinup pisnep diniᅅ, Kawnan nuk yokek apiy yip mindpun gok kunep apun, “Ñin akay rek kim kisenimb ay, ñapan nuk yimb yipund giy mindeniᅅgambun aᅅgiy,” lum ar biy miker gakniᅅ kond mindpun.

²⁴ Nup chingon chinup diniᅅgamb aᅅgiy, gos sek mindon mey, chinup dak. Pen ñin kun ak chinup pisnep dipkop ak; miᅅiy gos sek mindiy, ñin kisen ak ma kond mindombinup; pisnep kim kisenimb ay, mindombinup. ²⁵ Pen chinup kisen direp giniᅅgamb ak niᅅiy mey, yiruk gakniᅅ ma kond mindpun; gos sek kond mindpun.

²⁶ Biynimb tep ma mindpun rek, Gor Kawnan ak chinup kond nep mindip. Chinup miker yimb gek, Gor nup angninjun apun ak pen; minim yerip ak diy angnun angnon, Kawnan nuk chinup kosyam angep rek ayek ninijy, Gor nup angninimb. ²⁷ Gor gos chin ninibun ar gok mangiysekeykey ninimb ak mey; Kawnan nuk ak miker chinup gip ak ninijy angninek, angnip rek gip. Yenen: Kawnan nuk angningamb ak, Gor giyn angniy ninimb ar anep angningamb.

²⁸ Kun ak mey, Gor chinup dininng gek, nup gosimb ninibun biynimb gok, kond mindaknin, tap gunap key ma giningamb; nuk ninjek mindrep giningambun ar anep chinup giningamb. ²⁹ Pen ar kun anep, Gor biynimb nuk dininng ninjak gok kuyip angak, “Yand gen kiy Ñiyand Krays mindrep gip rek mindrep gey mey; numam nunay kisen nuk gok kunay yimb mindeningambay angak.” ³⁰ Kun ak chinup dininng, suk angek nup ker amon angnip, “Tap siy tap timey gipik ak ninijy kirgisiyn. Kun ak yand yip jimñiy mindiy mey; yand bi tep kun ak key mindpiyn rek mindeningambim angnip.”

Chinup Wasemb Ay Kond Mindrep Gip

³¹ Pen chinup kun giy direp gip ak, an chinup timey giningamb? Mer yimb! ³² Gor nuk ma pirikiy, Ñinuk ak chinup nen angniy yokek apiy kumak ak ninibun: chinup kond mindek, mindrep yimb giningambun. ³³ Pen Gor gek sun-tep mindpun ak, an rek chinup kor giningamb? ³⁴ Bi kun ak rek bap ma mindpay. Nuk key Ñinuk nup

aᅅgek, ap chinup aᅅgiy kumiy tikjakiy, am ñin yipund kind nuk okok ken mindiy, chinup nen Nop nup aᅅgniᅅ mindip.

³⁵ Krays chinup wasemb yimb ayip ak, tap yerip ak gek jimñiy ma mindoniᅅgambun?

Miker gunap giniᅅgamb akan,

kosyam mindeniᅅgambun akan,

gos yomb niᅅniᅅgambun akan,

yiwan yomb apek akan,

chech ma mindek akan,

Krays ker mindpay aᅅgiy chinup timey giniᅅgambay akan,

ñanᅅniᅅgambay akan, tap yerip ak gek, Krays yip jimñiy ma mindoniᅅgambun?

³⁶ Minim kun ak rek Baybol buk ak tikiy aᅅgyak:

“Nip ker mindpun rek, chinup niᅅey, kanj siyp-siyp tap gok rek ayek, ñanᅅgayun aᅅgiy nep niᅅbay aᅅgyak.”

³⁷ Kun ak kumemb rek mindpun ak pen; Krays, bi chinup simb niᅅiy kumak ak yip mindiy, tep gakniᅅ nep mindpun. ³⁸ Ar kun ak yand niᅅrep yimb gipiyn; mindeniᅅgambun akan kum-niᅅgambun ak, Gor chinup wasemb aynep mindeniᅅgamb. Tap bap chinup tuᅅgasik key ayn-imuᅅ rek ma ayip. Gor enjol nuk gok, Seytan kichekiy nuk gok, tap kalrimey gok, tap miñiy mindip gok, tap kisen mindeniᅅgamb gok, ³⁹ tap nukyon mindip gok, tap nukyan mindip gok, tap yerip yerip mindip okok maᅅgiysek, tap bap chinup kun giniᅅgiy rek ma ayip. Krays mindip rek, Gor chinup wasemb aynep mindeniᅅgamb.

9

Gor Gosimb Nuk Key Ninjy Jiwda Kay Kuyip Diniŋgak

¹ Yand Krays binuk mindpiyn rek, yesek ma anŋningayn. Gor Kawnan ak namb yip biyaŋ, “Niŋind nep anŋning gispan anŋip.” ²⁻³ Biynimb yand Yisrel kay, Krays nup ma dipay gok, kisen kor giy yiwur yomb diniŋgambay ak, yip simb timey giy gos kun anep ayip. Minim kun ak niŋind nep aspiyn. Kinjenj mindek, yand kuyip nen yiwur den, kiy pen kim ambiyap.

⁴ Pen Gor Yisrel kay kuyip, ñapan yand mindeyan anŋiy gek, kiyk low minim ak niŋiy, melik tep nup ak niŋiy, kuyip minim giniŋgayn anŋiy anŋayak gok niŋiy, nup anŋniŋep ar ak niŋiy gipay. ⁵ Basind chin Ebrahim, Aysek, Jekop Gor nup gosimb niŋyak gok, tik dand amiy apiy giy kuyip tikyak. Kiñiŋ nokom kun anep tik dand amiy apiy giy, Krays nup biyimb rek tikayey, nuk Biyomb yimb mindiy, biynimb maŋgiysek kond mindip! Kun ak yimb nup ak nep dand aranemb! Tep.

⁶ Gor Yisrel biynimb gok kuyip diniŋgak ak pen, gunap nup kirgey, biynimb nuk rek ma ayip. ⁷⁻⁹ Kiyk apay, “Basind yes chin Ebrahim kiñiŋ nuk mindpun rek, Gor chinup diniŋgamb apay” ak pen; kuyip ma diniŋgamb. Gor Ebrahim nup minim anŋay anŋak, “Simiy kisen ak, biyn nand Sera ñi bap tikniŋgamb anŋek,” niŋind anŋip anŋiy niŋmindiy, anŋak rek ñi ak tikrik. Kisen nup minim ar nokom kun anep minim anŋaying anŋak, “Nak sek, ñapan nak gok sek biynimb yand

mindeningambim angak.” Pen ñapan nuk tikek tikey amnak gok kuyip mangiysek ma angak. Yenen; minim bap angak, “Ñinak Aysek tikek tikey amningamb gok nep, Ebrahim ñapan nuk angningambay angak.” Kun ak niñbun: minim giningayn angyi angyak kun ak, basind yes Ebrahim tikek tikey wip gok kuyip mangiysek ma angak; Ebrahim Gor nup gosimb niñak rek niñbay biynimb gok kuyip nep angak.

¹⁰⁻¹³ Pen biynimb gok low ar ak gey niñiy akan; ar gunap gey niñiy kuyip ma dip; biynimb nuk key simb niñimb gok kuyip dip. Wosrey Aysek biynuk Rebeka, ñi pirengiy ma tikak won ak, Gor nup angak, “Ñi nand nind tikningamban ak, biyomb rek ma mindeningamb; nuk ñinak kisen ak nup won g giñiningamb angak.” Pen minim bap Baybol buk ak tikiy angyak, “Yisow nup niñen yip tep ma gip; Jekop nup niñen yip tep gip angyak.”

Gor Yipund Giy Nep Gip

¹⁴ Kun ak Gor yipund giy ma gip angyun? Mer! Nuk yipund giy nep gip. ¹⁵ Nuk Mosis nup angak, “Biyimb mapin niñning mapin niñningayn.

Simb niñning gos yand key niñiy simb niñningayn angak.”

¹⁶ Kun ak niñbun; nuk biynimb gok dining, gipay ar ak niñiy akan; biynimb gunap angye ma dip; nuk key simb niñimb rek kuyip dip.

¹⁷ Baybol buk minim bap tikiyak ak; Yijip nimb biyomb Perow; Yisrel biynimb kuyip won ak ‘Amningambim’ won ak ‘Ma amningambim’ angyi angek angek, Gor Perow nup gos timey ak ñinen ñek kindiy amek angak, “Kun gipan ak nip timey

gen, yip Biyomb yimb ak niñiy minim kun ak anğ amiy apiy gey, yimb yip ak miñmon okok mañgiyse amningamb anğak.”¹⁸ Kun ak niñbun: Gor gos nuk key niñimb rek, biynimb gunap kuyip simb niñiy dip; biynimb gunap kuyip ñinen gek, gos timey kiyk niñbay ak kindiy amek, nup ma dipay.

¹⁹ Nimb gunap Gor gip kun ak rek niñiy anğningambim, “Nuk nep gek gos kiyk ak kindiy amek, yenen pen mindrep ma gipim anğiy kuyip minim yomb anğningamb anğningambim.”²⁰ Kun anğningambim ak pen; nimb Biyomb an rek mindiy, minim nup ak day dingingambim?

Bi bap man ak diy, sinğey tiyn ak gayek, yip yenen kun giy gaypan anğiy ma anğningamb. Mer yimb!²¹ Bi sinğey tiyn giningamb ak, nup key niñek tep giningamb rek giningamb. Man band nokom bap tunğrik dand apiy, tiyn tep bap, tiyn monmon bap gining giningamb. Ak minim ma mindip.²² Kun ak rek mey Gor gip. Nuk biynimb tap timey gi mindpay gok niñek, yiruk yimb gek, kilis nuk mindip ak niñyan anğiy, kuyip timey ginimuñ ak pen; biynimb gunap dinging niñayak rek, kuyip kasek kun ma gip.²³ Pen nuk bi tep biynimb simb niñimb ak, biynimb niñyan anğiy; chinup dinging niñayak gok simb niñiy dingingamb ak; gos nuk key niñimb rek giningamb.²⁴ Chinup dinging niñak kun ak, Jiwda gok nep mer: biynimb Jiwda mer gok kunep dinging niñak.²⁵ Minim ar kun ak rek, Hoseya Gor minim anğiy anğak:

“Toymenik, biynimb yand ma anğyngipiyn gok kuyip, biynimb

yand angningayn. Pen wasemb ma ayingpiyn
gok, kisen wasemb
yimb ayningayn. ²⁶ Nind biynimb yand mindpim
angiy angen,
ma niyningipay miñmon okok, kisen Gor Biyomb
permindep ak,
ñapan nuk mindpay angningambay angak.”

²⁷ Pen bi Gor minim angep Asaya minim bap
tikiy angak:

“Yisrel kay, kamb kilup rek kunjaynep min-
deningambay ak pen;

yep kaw bap nep kim amningambay. ²⁸ Yenen:
ñin kun ak apek, Gor biynimb man ar
biy mindiy timey gipay gok kuyip, pen
giningamb ak; kasek gi day jiwñiningamb
angak.”

²⁹ Giningamb kun ak, Asaya nind angak:

“Biyomb sikerek ak, chinup Jiwda biynimb yep
kaw bap nep kirginingamb. Nuk biynimb
simb niñimb rek, gunap mindeningambun;
yikop ak Sodom Gomora biynimb kuyip
pisnep yin simbok amnak rek ak, chinup
gipkop angak.”

Jiwda Kay Jiysis Nup Gosimb Ma Niñyak

³⁰ Kun ak niñim! Biynimb Jiwda mer gok nind,
mindrep giy Gor yip jimñiy mindenjun angyi
gos ak ma niñyak ak pen; miñiy nup gosimb
niñiy, nuk yip jimñiy mindpay. ³¹ Pen Jiwda
biynimb nind Gor low minim ak diy, angyip angyip
rek ginjun angyak ak pen; miñiy nuk yip jimñiy
ma mindpay. ³² Yenen: Gor nup gosimb niñiy
mer; chin key ar gunap giy, nuk yip jimñiy

mindeningambun angyi, kamb tep ayak ar ak amningiy rek mindakni, tomb kiyk ak aldek apyap pikpay. ³³ Minim kun ak rek Baybol buk ak tikiy angyak:

“Niñim! Yand miñmon Sayon kamb tep ak ayen, biynimb gok tomb kiyk ak ar kun ak aldek, apyap pikningambay; pen biynimb nup gosimb niñningambay gok, kor giy nambin ma dingingambay angyak.”

10

¹ Mam ay sikop. Biynimb yand Yisrel kay Gor ker ma mindpay ak; yip miker gek, nup per angninbiyn. ² Yand niñbiyn: chin Gor biynimb nuk mindon angyi, kilis yimb gipay ak pen; gos niñrep giy ma gipay. ³ Kiyk Gor biynimb gok kuyip, biynimb suñ-tep yand angyi dip minim ar ak ma niñiy, gos key niñbay rek, low ar ak gon chinup dingingamb angyi gi dand amiy, apyap pikpay. ⁴ Pen low nuk ayak junj ak Krays nep. Yenen: Gor low ak mindakni, biynimb gok suñ-tep ma mindpun angyi Krays nup gosimb niñningambay, Nop kuyip diy, biynimb suñ-tep yand angningamb.

Biynimb Gok Nup Angniney Kuyip Dingingamb

⁵ Mosis Yisrel kay kuyip angak, “Low minim ak diy suñ-tep mindning, low angnip angnip rek giy mey, kim amningambim angak.” ⁶ Pen Gor biynimb Krays nup gosimb niñiy, suñ-tep mindeningambay minim ar ak angyi angak, “Semb biyon nimb rek ma am ponind winingambim; ⁷ beñ nukyan nimb rek ma am

ponjind winiᅅgambim; ⁸ minim kun ak par okok ma mindip. Minim per apim ar anep aᅅgak.” Minim aᅅgak kun ak mey, Gor nup gosimb ninjy nuk yip jimñiy mindoniᅅgambun aᅅgiy, minim per aᅅᅅimbun ak.

⁹ Kun ak, Krays Gor Ñinuk ak mey tikjakip aᅅgiy, gos ninmindiy; Jiysis nep Biyomb yand aᅅgiy misen aᅅgniᅅgambim ak, Gor nimbip biynimb suᅅ-tep yand aᅅgiy diniᅅgamb. ¹⁰ Yenen: Jiysis nup gosimb niᅅbun rek, Gor chinup dinimuᅅ rek ayip; pen Biyomb chin aᅅgiy, misen apun rek chinup pisnep dip. ¹¹ Wosrey Baybol buk ak, minim tikay aᅅgyak, “Biyimb an an nup gosimb niᅅniᅅgambay gok, Gor nup ninjy ñawil ma diniᅅgambay aᅅgyak.” ¹² Jiwda biynimb gok key diy; Jiwda biynimb mer gok key diy ma giniᅅgamb. Biyomb nokom mindip rek, biynimb akay akay nup gosimb ninjy aᅅgniᅅbay gok direp yimb gip. ¹³ Ar kun anep aᅅgiy aᅅgyak, “Biyimb gok nup aᅅgniᅅy, kuyip diniᅅgamb aᅅgyak.” ¹⁴ Pen nimb gunap aᅅgniᅅgambim, “Biyimb gunap minim tep nup ak dand apey ninjy rek, nup gosimb ninjy nup aᅅgniᅅbinup. ¹⁵ Gor bi minim tep nup aᅅᅅemb gunap ma yokip ak, yergiy minim tep nup ak ninjun aᅅgniᅅgambim.” Ar kun ak Baybol buk ak tikiy aᅅgyak:

“Biyimb Gor minim dand opay gok, tep yimb dand opay aᅅgyak.”

¹⁶ Pen bi Asaya Gor minim tep ak aᅅgek, biynimb gunap ma niᅅy, nuk Gor nup aᅅgak, “Chin minim tep nip ak aᅅgon, ma nep dipay aᅅgak.”

¹⁷ Gor minim ak timund pik ninmindiy nep, nup

gosimb niñbay. Minim kun ak, Krays minim tep ak. ¹⁸ Pen Yisrel kay minim kun ak anğey ma niñyak anğiy ma anğep. Kiyk nind niñyak ak mey; Baybol buk tikiy anğyak, “Minim tep kun ak miñmon okok kind kind, mañgiysek yimb amimb anğyak.” ¹⁹ Pen nimbip tip ak aspiyn: Yisrel biynimb minim kun ak ma niñyak anğiy ma anğnimimb; kiyk nind niñyak. Mosis Gor minim ak tikiy anğak:

“Yand biynimb sakiy sek wikan gunap kuyip diy, direp gen, nimb Yisrel biynimb miluk yapek, chinup rek kun ma gip anğiy niñniñgambim anğak.”

²⁰ Pen bi Asaya misen yimb anğiy anğak:

“Gor anğip, ‘Biynimb yip ma niñbay tunğon okok, yimb yip ak ñin gunap ma apay ak pen; kisen kuyip diniñgayn anğip’ anğak.”

²¹ Pen Yisrel gipay rek minim ak anğiy anğak:

“Gor anğip ‘Owim anğiy, per ñinan gi gi mer niñiy kirpiyn.

Kiyk alemb alemb ñiy, gos kiyk key niñbay rek nep gipay anğip’ anğak.”

11

Yisrel Kuyip Pisnep Ma Kirgip

¹ Kun ak Gor Yisrel biynimb gok kuyip pisnep ma kirgip. Yand kunep, Yisrel nimb. Ebrahim tikek tik dand amiy, Benjamen nup tikey, nund pen tik dand amiy apiy gak kiñiñ ak, yand mind-piyn. ² Gor biynimb wosrey diniñ niñak gok kuyip ma kirgip. Yilayja nup kesim Baybol buk tikiyak ak niñbim. Yilayja Gor nup anğniñiy anğak:

³ “Yisrel biynimb gok mangysek nip kirgiy, kamb bind giy tap pik simbonqipay ak, piklak pikey amdek, bi minim nip anjep gok kuyip pik ay gipay. Yand nokom mindpiyn ak pen; yip kunep pikayun angyi, yuk taspay angak.”

⁴ Anjek, Gor nup pen angak:

“Bi yand kunay yimb nep, sepen tawsin mindpay ak, Bal gor yesek anup, biyomb chin angyi, ma angninbay angak.”

⁵ Kun ak rek miñiy, Yisrel biynimb kunaynep Gor nup kirpay ak pen; chinup gunap dining gos ninayak gok simb ninjiy dip. ⁶ Pen low ar ak ninon akan, tap ar gunap key gon ninjiy ma dip; nuk bi tep biynimb angedep ak mey; chinup simb ninjiy dip. Tap bap gon ninjiy dembikop, chinup simb ninjiy dip apnup ak, yesek apnup. ⁷ Kun ak Yisrel biynimb low ar ak giy, Gor yip jimñiy mindoningambun angyi tinjiy ay gipay ak pen; nuk yip jimñiy ma mindpay. Nuk dining ninayak gok nep dip; gunap pen minim nup ak ninjiy, ninbun ma ninbun tikpay.

⁸ Wosrey Baybol buk ak tikiy angyak:

“Gor kuyip gek, wisin kiniy, windin koy giy, sakiy sek ay, ar kun anep mind dand amiy mindpay angyak.”

⁹⁻¹⁰ Pen basind Depiyt minim ar nokom kun anep, Baybol buk ak tikiy angak:

“Kun gipay kun ak, kuyip ninney tep gip ar anep gi tanjey tanjey, windin koy gek, singaw kaw ak amiy, ñawil diy, ñik giy nep mindeningiy angak.”

¹¹ Pen Jiwda kiñiñ apyap pikpay ak, pisnep ma apyap pikpay; Gor kuyip diniñg niñimb. Kiyk tap siy tap timey giyak rek, kuyip kirgiy, biynimb Jiwda mer gok kuyip disap. Biynimb yikop gok den mey; Jiwda kay, chinup rek kun giy ma dip angyi, yip ker winiñgiy angyi gisap.

¹² Jiwda kay nup gosimb ma niñiy, tap siy tap timey gipay ñin biy, biynimb yikop gok kuyip direp gisap. Kun ak niñbun: Jiwda biynimb diniñg niñayak rek diniñgamb ñin ak, biynimb yikop gok kuyip direp yimb giniñgamb.

Yisrel Mer Gok Kuyip Disap

¹³ Gor yip Jiwda biynimb mer gok kuyip minim tep ak anğñinimin angek mey, nimbip Jiwda mer gok anğñen yip tep gip. ¹⁴ Pen nimbip anğñen niñem, biynimb yand Yisrel gunap niñiy, Gor chinup rek ma dip angyi, nup ker winiñgiy ak; yip tep yimb giniñgamb. ¹⁵ Gor Yisrel biynimb kuyip kirgak rek, biynimb yikop gok kuyip dip. Kun ak kisen Yisrel kuyip dek, pisnep kumiy tip tikjakpay rek ak ayñiñgamb.

¹⁶ Basind yes sikop Gor ker mindeyak rek, piñ alik kiyk gok kunep nup ker mindeniñgiy. Mon oliyp junj bap Gor ker mindonimun, piñ alik gok mangyisek nup ker mindeniñgiy.

¹⁷⁻¹⁸ Pen Gor mon oliyp alik nindnimb gunap tuñgsak yokiy, nimbip oliyp alik sangyi okok nimb gunap dapiy yimñek, wopsakiy mindpim. Kun ak mey, mon oliyp nindnimb ak, mind giyangek nimb mindpim; niñrep giy angyiwnimimb. ¹⁹ Pen Gor chinup oliyp alik sangyi okok nimb dapiy, oliyp alik nindnimb gok

tunqsak yokek, tip kun ak diy mindpun angyi gos ak ma niñnimimb. ²⁰⁻²¹ Nimb biynimb Jiwda mer gok, minim kun ak niñind angningambim ak pen, niñrep ginimimb. Jiwda kay Jiysis nup gosimb ma niñey, kuyip kirgak; nimb pen nup gosimb niñem, nimbip dak. Pen Gor mon oliyp alik nindnimb gok tunqsak yokak rek, nimbip kunep ginimuñ rek ayip ak, yimb nimbik key ma dand aranimimb.

²² Gor bi sayn tep yimb ak pen; bi kalrimey mindip. Biynimb nup kirpay gok kuyip kirgip; biynimb nup gosimb niñbay gok dip. Kun ak Jiwda kuyip gak rek, chinup kunep ginimuñ rek ayip angyi, niñrep yimb ginimimb. ²³ Jiwda biynimb kun gok, Gor nup gosimb ma niñjun angyi mindpay ak pen; nup tip ak gosimb niñey, kuyip diniñgamb. ²⁴ Nimbip mon oliyp alik sangyi okok nimb dand apiy, pikyimñek mindpim ak; oliyp alik nuk yipund giy ak tip ak pikyimñining, pikyimñiningamb.

Kisen Yisrel Mindeniñgambay Rek Diniñgamb

²⁵ Pen mam ay sikop. Yimb nimbik key dand aranimimb rek ayip. Kun ak minim nind ma niñyñgipun bap nimbip angning gispiyn. Yisrel biynimb miñiy windin koy rek mindpay ak pen; per kun ma giniñgamb. Gor biynimb Jiwda mer gok kuyip diniñg niñayak gok mañgiysek diy, ²⁶ kisen Yisrel kuyip mañgiysek diniñgamb. Minim kun ak rek Baybol buk ak tikiy angyak:

“Yisrel kay yip kirpay gok kuyip diniñgamb Biy-omb ak, miñmon Sayon nimb winiñgamb.

²⁷ Apek, minim anğaynik rek, tap siy tap

timey gipim ak niñiy kirginiḡayn aḡgip aḡgiy tikyak.”

²⁸ Pen Gor wosrey basind Ebrahim, Aysek, Jekop kuyip minim aḡgay aḡgak, “Kisen ñapan nimb tikem, tikey amniḡgamb gok, kuyip diniḡgayn aḡgak.” Aḡgak kun ak niñbun: Jiwda kay kuyip pisnep ma kirgip. Ñin namb biy nep, Krays minim tep nup ma dipay rek, kuyip kirgiy, nimbip biynimb Jiwda mer gok diyn aḡgiy gisap. Pen gip kun ak kuyip pisnep ma kirgip. ²⁹ Nind simb niñiy, diniḡ niñayak rek diniḡgamb. Nuk tap bap giniḡ, minim nep ma aḡgip; giniḡgayn aḡgiy niñimb rek gip.

³⁰ Nimb Gor nup minim tep ak diyokyiḡgipim ak pen; kisen Yisrel biynimb nup kirgey, nimbip pen dek, nuk yip mindpim. ³¹ Nimbip simb niñiy dak kun ak rek, Yisrel biynimb minim nup diyokpay gok kuyip kunep, simb niñiy diniḡgamb.

³² Kun ak niñbun; Gor Jiwda biynimb gok, Jiwda biynimb mer gok, maḡgiyseḡ kuyip ñinen kirgek, tap siy tap timey gi dam dam, kisen yenen timey gispun aḡgiy, Gor nup gosimb niñey, kuyip dip.

Gor Yimb Nup Per Dand Aranemb

³³ Kun ak yand niñbiyn; Gor bi gos tipaḡgiy yimb niñiy, ar kun ak key yimb gip. Nuk key yimb niñiy gip kun ak rek gun aḡgiy, ma yimb giniḡgambun. ³⁴ Baybol buk ak tikiy aḡgyak:

“Biynimb an nuk gos tipaḡgiy niñimb rek niñiy, nup kun gan, kun gan, aḡḡniḡgamb? ³⁵ Pen biynimb an Gor nup tap kim yisik ayek, pen yisik ayniḡgamb? Mer yimb! Biynimb bap nup kun giniḡgiy rek ma ayip aḡgyak.”

³⁶ Nuk Biyomb yimb. Tap okok maŋgiysek ñin ar nuk anep mindip. Yimb nup ak perper nep dand aranemb! Tep.

12

Gor Ker Mindpun Anġiy, Nup Tep Ginimuŋ Ar Ak Gem Amnimuŋ

¹ Kun ak mam ay sikop. Nimbip simb niŋiy dip ak, opriyŋ ñimbay rek; mumbwak gos timund nimb ak maŋgiysek nup ker amnimuŋ. Tap dand amiy, Gor nup simboŋg ñimbay gok, tap timey timey gok ma ñimbay; tap tep tep gok nep ñey mey, nuk dip. Kun ak, chinup opriyŋ rek dinimuŋ anġiy, nup gosimb niŋiy, anġip anġip rek nep ginimimb. ² Biynimb niŋmindpay rek, miñ kuyip ar ak dinjun anġiy ma anġnimimb. Pen Gor nimbip gos ñakniŋ, biynimb key kindiknimb rek aynimimb. Nimbip gos ñek, key kindiknimb rek ay gem amek mey; yipund giniŋgamb ar ak, mindrep gep ar ak, nup tep giniŋgamb ar ak niŋrep giniŋgambim.

³ Pen Gor yip simb niŋiy dek woŋg nup gipiyn ak, nimbip maŋgiysek aspiyn: chin Gor nup direp gipun rek, yimb chin yiy ar biyoŋ mindip anġiy ma niŋjun. Pen chinup kond mindiy gos tep yerip yerip rek ñimb ak niŋiy, ar kun ak gon amnimuŋ.

⁴ Chin niŋbun: mumbwak nokom mindip ak pen; tomb ak woŋg nuk ak key gip; ñin ak woŋg nuk ak key gip; windin ak woŋg nuk ak key gip. Kun ak, day keykey mindip rek, woŋg keykey nep gipay.

⁵ Chin Krays ker mindpun gok kunep, kun ak rek mindpun. Wonḡ keykey gipun ak pen; biynimb kiñiñ nuk nokom mindiy mey; pen wasemb ayek, pen wasemb ayek gipun. ⁶ Gor chinup kilis keykey ñimb rek, gos ar keykey niñbun ak mey; chin gunap, biynimb gunap kuyip Gor minim aḡñemb rek ayek, Gor gos tep ñimb rek niñiy, kuyip aḡñinjun. ⁷ Biynimb gunap kuyip tap marik gep rek ayek, marik ginjun. Tiysa mindep rek ayek, tiysa mindiy, aḡñirep ginjun. ⁸ Timund winjikep rek ayek, timund winjikjun. Biynimb chin gunap kuyip tap ñemb rek ayek, monmon ñinjun. Biynimb chin gunap kuyip kond mindep rek ayek, niñrep giy kond mindrep ginjun. Pen mam ay gunap kuyip, simb niñiy dep rek ayek, tep gakniñ dinjun.

Biynimb Gok Wasemb Aynimimb

⁹ Biynimb gok kuyip wasemb aysipun aḡiy yesek ma aḡnimimb; kuyip wasemb ay, direp yimb ginimimb. Tap siy tap timey gep ak kirgiy, Gor miñ tep ar ak dinimimb. ¹⁰ Pen yimb nimbik ak key ma dand aranimimb; mam ay Krays ker mindpay gok yip penpen wasemb ay, yimb kuyip ak dand aranimimb. ¹¹ Yiruk yiruk sek wonḡ ma ginimimb; tep gakniñ, Biyomb chin ak nup wonḡ gispun aḡiy, girep ginimimb. ¹² Gor chinup diniḡamb aḡiy, tep gakniñ kond mindenimimb. Nimbip miker ñeniñgiy, gos kun ak ma niñnimimb. Gor nup minek minek aḡniñmindenimimb. ¹³ Biynimb Gor ker mindey tap ma mindip gok, tap nimb gunap kuyip bilok

ñinimimb. Biynimb par okok nimb apeniŋgiy, girep ginimimb.

¹⁴ Biynimb gunap nimbip gi timey gey, pen miluk ma niŋnimimb, Gor nup aŋgniŋem, kuyip kond mindrep ginimuŋ. ¹⁵ Biynimb gunap tep gakniŋ mindey, kiy yip tep gakniŋ mindenimimb; pen gunap simb gakniŋ mindey, kiy yip simb gakniŋ mindenimimb. ¹⁶ Chin biynimb yimb sek mindpun aŋgiy niŋbim gok, yimb nimbik ma dand aranimimb. Biynimb yimb ma mindip gok yip wilikiy mindenimimb. Chin nep niŋrep gipun aŋgiy, ma aŋgnimimb.

¹⁷ Pen biynimb gunap nimbip miluk niŋey, pen miluk ma niŋnimimb. Biynimb gok niŋey tep giniŋgamb ar anep ginimimb. ¹⁸ Biynimb gunap yip penpen gun aŋgiy gos ak ma niŋnimimb; kap-kap jimñiy mindonjun aŋgiy gos anep niŋnimimb.

¹⁹ Pen biynimb tep yand gok. Nimbip aspiyn; biynimb gunap nimbip timey geniŋgiy, kuyip pen timey gun aŋgiy gos ak ma niŋnimimb. Ak Gor gos nuk. Kuyip pen timey giyn aŋgiy, key niŋimb rek giniŋgamb. Baybol buk ak tikiy aŋgyak, “Gor aŋgip, ‘Kiyk timey gipay ak, pen kunep timey giniŋgayn ak; gos yand aŋgip’ aŋgyak.” ²⁰ Kun ak biynimb nimbip timey giyak gunap kuyip yiwan gek, keñmaŋgiy ñinimimb. Kuŋam ak kinjik gek, ñiŋg ak ñinimimb. Kun gem niŋiy, kuyip yenen timey gipun aŋgiy, gos kuŋay niŋniŋgambay. ²¹ Kun ak mey, nimbip timey geniŋgiy, kuyip pen timey ma ginimimb; mindrep gem, key sayn gek amnimuŋ.

13

Gapman Kay Anḡningiy Rek Ginimimb

¹ Pen gapman biyomb gok, anḡningiy rek ninjun. Kiyk key gos ninjiy biyomb ma mindpay; Gor anḡek biyomb mindpay. ² Kun ak minim kuyip timbrikiy, Gor minim ak sek timbrikningambun ak mey; minim mindeningamb. ³ Biynimb mind tep gipun gok, gapman biyomb gok kuyip ma pirikningambun; biynimb mindrep ma giningambay gok nep pirikningambay. Kun ak, biyomb gok kuyip ma pirikjun anḡiy, mind tep gem mey; nimbip “Tep gipay” anḡningambay. ⁴ Gor anḡek chinup kond mindpay ak mey, mind tep giningambun. Pen ñinen anḡek, ñayip baynat ak di mindpay rek; biynimb mind tep ma giningambun gok dand kor amiy, timund winjikningambay.

⁵ Kun ak pen yiwur dinjun rek ayip anḡiy, minim kuyip ak kindik ma ginjun; Gor kuyip ñinen anḡayek chinup kond mindpay ak; yenen minim kuyip timbrikjun anḡiy, mindrep ginjun.

⁶ Ar kun ak nep mey, takes kunep pikpun. Gor kuyip ñinen anḡek woḡg kiyk kun ak giy mey, maniy dipay. ⁷ Kun ak biyomb gok anḡningiy rek ninnimimb. Biynimb yimb dand aranemb gok kuyip, yimb dand aranimimb: biynimb takes ñemb gok kuyip, takes ñinimimb. Pen takes ar key gunap ñinimimb anḡeningiy, ak kunep ñinimimb.

Penpen Wasemb Aynimimb

⁸ Tap day nimb gunap mindonimun; pisnep day pang jiwnimimb. Pen tap day nimb rek mindonimun; penpen wasemb ayep ar ak. Yenen; biynimb gok kuyip wasemb ayniᅅgambun ak; Gor low minim aᅅgak aᅅgak rek giniᅅgambun. ⁹⁻¹⁰ Biyn siy bi siy ma giniᅅgambun; tap siy ma diniᅅgambun; chip ma ᅅaᅅganiᅅgambun; biynimb gunap tap kuyip gok yip rek mindambikop aᅅgiy ma niᅅniᅅgambun. Gor low yerip yerip aᅅgak gunap ma timbrikniᅅgambun. Biynimb wasemb ayniᅅgambun rek, mumbwak chin key girep gipun rek kuyip kunep giniᅅgambun ak; Gor low gunap ma timbrikniᅅgambun.

¹¹ Kun ak yenen wisin kil kin mindpim? Jiysis nup wosrey dipik. Pen miᅅiy, nuk winiᅅgamb ᅅin ak takiy asaw. ¹²⁻¹³ Kisyimnamb rek tapin per mindpun ak, miᅅmon yowniᅅ gisap. Kun ak, Jiysis melik tep ar ak mindiy, miᅅmon yapek, windin niᅅiy tapay rek taᅅgenimimb. Pen ᅅiᅅ kilis ᅅimbiy, ¹⁴ sakiy ay, gos timund yesek niᅅiy gipim ar gok kirgiy, Jiysis Krays nup pisnep chiᅅgiy, nuk mindrep gip rek mindenimimb.

14

Asik Mosik Gipay Gok Kuyip Aᅅg Sikoy Ma Ginimimb

¹ Biynimb Gor nup chiᅅgipay ak pen; chiᅅgrop ma giy, gos omiᅅal niᅅbay gok kuyip, aᅅgrop gon gos tep niᅅniᅅgiy aᅅgiy, kuyip minim gunap ma aᅅg ginimimb; Gor ker mindpay rek, biynimb chin aᅅgiy dinimimb. ² Chin niᅅbun: biynimb

gunap Gor nup gosimb niŋmindiy, tap okok monmon ñimbay; pen biynimb gunap Gor nup gosimb ar ar nep niŋiy, nup tep ma giningamb aŋgiy, kanj tap okok bul giy ma ñimbay. ³ Pen biynimb tap monmon ñimbay gok, biynimb tap bul gipay gok kuyip ma aŋjiwniŋgiy. Biynimb tap bul gipay gok; biynimb tap monmon ñimbay gok kuyip, Gor niŋek tap siy tap timey gispay aŋgiy, ma aŋniŋgiy. Yenen: Gor biynimb kun gok kuyip dek nup ker mindpay. ⁴ Pen minim kun ak rek, pen aŋg dam ayek, pen aŋg dam ayek, ma ginimimb. Ak Gor minim nuk. Kuyip kond mindakniŋ, biynimb nuk nep mindeniŋgambay.

⁵ Pen biynimb gunap niŋey, ñin nokom nokom Gor ñin yomb nuk rek ayip; biynimb gunap niŋey, minek minek ñin nokom rek ayip. Kun ak nimb nokom nokom mindpim rek, gos tep nimbip wip ar ak niŋiy gem amnimuŋ.

⁶ Gor ñin yomb nuk ak, ñin nokom nokom wip aŋgiy niŋbay biynimb gok, Gor nup tep ginimuŋ aŋgiy, kun giy niŋbay. Pen minek minek ñin nokom rek ayip aŋgiy niŋbay biynimb gok kunep, Gor nup tep ginimuŋ aŋgiy mey, kun giy niŋbay.

Biynimb tap monmon ñimbay gok, gos peyiŋg ma ñimbay: Gor nup tep aŋgiy ñimbay. Biynimb asik tep giy, tap gunap nep ñimbay gok kunep, Gor nup tep aŋgiy nep ñimbay.

⁷ Pen chin niŋbun: kim mindiy Biyomb chin ak yip mindpun; kumniŋgambun ak kunep, nuk yip nep mindoniŋgambun. ⁸ Pen kim mindiy, chin key mindpun aŋgiy ma aŋgep. Kumniŋgambun ak kunep, chin key kumniŋgambun aŋgiy ma aŋgep.

Kumningambun akan, kim mindeningambun ak; nup ker nep mindoningambun. ⁹ Ar kun ak nep, Gor Ñinuk Krays nup yokek apiy, kumiy tikjakak ak mey; chin biynimb kim mindpun gok sek, kumyak gok sek kond mindeningamb.

¹⁰ Kun ak nimb mam ay Krays ker mindpim gunap, yenen namam nanay Krays ker mindpay gunap kuyip kun gipay kun gipay apim? Pen nimb gunap yenen namam nanay Krays ker mindpay gunap kuyip niñem, tap yikop rek ayip. Chin mangiysek, Gor apiyminay windin yirik ar kuyip ak mindon, kor niñningayr ak ma niñbim?
¹¹ Baybol buk ak tikiy angyak:

“Biyomb ak anqip, ‘Yand niñind yimb aspiyn. Kisen biynimb gok mangiysek yip niñiy, ñawil diy koñgim yimiy, Gor nep mey Biyomb mindip angningambay anqip’ angyak.”

¹² Kun ak niñim; chin mangiysek mindpun rek, nokom nokom angninek; yerip yerip gipun gok angniningambun.

Mam Ay Krays Ker Mindpay Gunap Kuyip Gos Niñnimimb

¹³ Kun ak mam ay gunap kuyip, kun gipay kun gipay apim ak kirgiy mindrep gem, ma apyap pikningiy rek aynimuñ ar ak nep niñiy, gem am-nimuñ. ¹⁴ Jiysis ker mindpiyn rek, yand niñrep gipiyn; tap bul gep gunap ma mindip. Biynimb gunap gos kiyk key niñiy, tap bul gipay. ¹⁵ Pen nimb mam ay Jiysis kuyip angiy kumak kun gok wasemb ma ay, tap kiyk asikpay gok, monmon ñimbem apyap pikningiy rek ayip. Kun ak tep ma giningambim. ¹⁶ Kun ak nimb key niñiy, ar

gunap ginimimb rek ayniᅅgamb ak pen; biynimb gunap nimbip niᅅey kuyip timey ginimuᅅ rek ayniᅅgamb ak, gos niᅅbim kun ak kirginimimb. ¹⁷ Gor biynimb diy kond mindeniᅅgamb minim ar ak kun giy mindip; tap monmon ñiᅅniᅅgambun akaᅅ, ma ñiᅅniᅅgambun ak, minim yomb mer. Minim yomb ak mey; Gor Kawnan ak chin yip mindakniᅅ, biynimb suᅅ-tep nuk mindiy, kapkap mindiy miñmiñ gipun ak. ¹⁸ Krays nup kun giy gosimb niᅅiy mind tep gon, Gor niᅅek tep giy, biynimb gok niᅅey tep giy giniᅅgamb.

¹⁹ Kun ak nimb maᅅgiyseᅅ, kapkap jimñiy mindep ar ak kindik giy, Gor nup chiᅅgrep gep ar ak kindik giy ginimimb. ²⁰ Pen nimb tap okok monmon ñimbem, Gor biynimb nuk gunap niᅅiy kunep ñimbiy, nup kirgiy apyap pikniᅅgiy rek ayip. Ak tep mer! ²¹ Kun ak nimb ñimbem, kiyk apyap pikniᅅgiy rek ayek niᅅiy, kanj kirgiy, ñiᅅ wayn gok kirgiy, tap yikop gok kirgiy giniᅅgambim ak tep.

²² Chin Gor nup gosimb niᅅmindyiᅅ, tap ñiᅅniᅅgambun akaᅅ, yerip giniᅅgambun ak; Bapiy Gor yip tap chin key. Chinup biynimb Gor gos tep ñimb rek niᅅiy gipun gok, miñmiñ giyiᅅ mindeniᅅgambun. ²³ Pen tap gunap gospar ayiᅅ ñiᅅniᅅgambun ak, minim diniᅅgambun. Yenen: Gor nup gosimb niᅅyiᅅ mer: tap gunap monmon giniᅅgambun ak, nuk niᅅek tep ma giniᅅgamb.

15

Biynimb Gunap Mindrep Giniᅅgiy Rek Ar Ak Nep Ginimimb

1-2 Chin Krays nup chingrep giy mindpun gok, key tep giniᅅgamb ar ak gun anᅅiy ma ginjun; biynimb nup chingrep ma gipay gok ching tep giniᅅgiy anᅅiy, gos ak niᅅiy ginjun. Chinup key tep giniᅅgamb ak minim yomb mer; pen biynimb gunap, nup ching tep giniᅅgambay akan, ma ching tep giniᅅgambay ak, minim yomb. ³ Krays kunep key tep gak ar ak ma gak. Baybol buk ak, Nop nup minim anᅅak gunap tikiy anᅅyak, “Wong nip gi minden, minim nip anᅅjiwpay ak, yip kunep apay anᅅyak.” ⁴ Baybol buk minim tikiyak gok maᅅiysek, yikop ma tikiyak; gos sek mindiy, Gor nup nep chingiy mindeyan anᅅiy tikiyak. ⁵⁻⁶ Kun ak Krays gak rek niᅅiy gun anᅅiy, Gor nup ching tep gem, nimbip kond mindakniᅅ, gos sek mindiy, biynimb Krays ker mindpay gunap yip, gos ar nokom niᅅiy, jimᅅiy mindiy mey; Biyomb chin Jiysis Nop nup yimb ak dand araniᅅgambim.

Gor Yisrel Mer Gok Kuyip Kunep Simb Niᅅimb

⁷ Gos niᅅrep ma gipik ᅅin ak, Krays nimbip dek biynimb nuk mindpim ak; nimb key penpen diy mindem, biynimb gunap niᅅiy, Gor nup yimb ak dand araniᅅgambay. ⁸ Pen Gor Krays nup, Jiwda kay kuyip anᅅiy yokak ak, kuyip nep diyn anᅅiy ma yokak. Jiwda kay nusind yes kuyip gok minim anᅅayak rek nup yokak ak pen; ⁹ Jiwda biynimb mer gok kunep simb niᅅiy den, yimb yip ak dand araniᅅgambay anᅅiy yokek awak. Krays nind Nop nup minim anᅅak rek tikiy anᅅyak:

“Kun ak, yand Jiwda biynimb mer namb okok mindiy, kamep angyi, yimb nip ak dand araniᅅgayn angyip’ angyak.”

10 Minim bap tikiy angyak:

“Nimb Jiwda mer gok, Jiwda biynimb gok yip jimñiy, Gor nup miñmiñ yimb ginimimb angyak.”

11 Pen minim bap angyak:

“Nimb miñmon keykey mangyisek kamep angyiᅅg, yimb nup yiy ar biyoᅅ dand aranimimb angyak.”

12 Pen bi minim nup anᅅep Asaya kunep anᅅak:

“Bi Jesiy tikek tik dand amiy tikniᅅgambay bap biyomb mindiy, Jiwda biynimb mer miñmon keykey mindpay gok; nuk chinup kond mindeniᅅgamb angyi, gos sek mindeniᅅgambay anᅅak.”

13 Kun ak Gor nup gosimb niᅅmindem, Kawnan nuk ak nimbip kond mindakniᅅ, gos sek mindem, tep kun ak key yimb ginimunᅅ.

Pol Gor Nup Wong Kilis Giy Gipiyn Anᅅak

14 Pen mam ay sikop. Yand nimbip niᅅbiyn: Jiysis nup diy, mind tep giy, gosimb tep niᅅy gipim ak mey; minim tep nup ak penpen anᅅñirep ginimimb rek ayip. 15 Pen minim nimbip kilis giy rek aspiyn ak, minim niᅅbun ak, yenen chinup tip asap angyi ma anᅅnimimb. Gor yip simb niᅅy diy, biynimb Jiwda mer gok kuyip minim anᅅñinimin anᅅek, nimbip anᅅñirep gispiyn. 16 Kun ak yand Jiysis Krays nup direp giyiᅅg, Gor minim tep ak dand amiy, Jiwda biynimb mer okok kuyip

aṅṅñen, Kawnan nuk ak gek, gos kiyk ak nup ker amek, biynimb suṅrep nuk gok mindeningiy.

¹⁷ Krays Jiysis nup chingiy, Nop nup wong gipiyn ak, yip key tep gakniṅ gipiyn. ¹⁸⁻¹⁹ Biynimb gunap giyak ar ak ma aṅṅningayn; yand key gipiyn ar anep aṅṅningayn. Krays nup chingiy minim tep nup ak dand taṅgying, Kawnan nuk tap mageprek gunap gakniṅ, Jiwda biynimb mer gok niṅiy, Gor nup gosimb niṅbay. Miñmon Jerusalem tikjakiy, minim tep nup ak aṅṅñirep gi dam dam miñmon paryomb Yilirykam amiy, andkind winik. ²⁰ Gos yand per niṅbiyn ak, biynimb Krays minim ma niṅyak miñmon okok nep amiy aṅṅñiyn aṅgiy niṅbiyn. Bi minim nup aṅṅñemb gunap sap piṅiyṅpay ar ak, korip giyn aṅgiy ma niṅbiyn. ²¹ Baybol buk ak tikiy aṅgyak: “Biynimb nind ma niṅyak gok, kisen niṅrep yimb giniṅgambay; biynimb minim nup ma niṅyak gok, kisen niṅningambay aṅgyak.”

Pol Miñmon Rom Amniyn Aṅgak

²²⁻²³ Kun ak simiy kuṅaynep, miñmon akniy aṅṅñi taṅg taṅg, miñmon nimb Rom amnim aṅgrik ak pen; ninim rek ma ayip. Pen miñiy miñmon tiṅgoṅ akniy, wong ginim ak ma mindip. ²⁴ Yep maṅ mindip, miñmon Speyn amning gispiyn. Gos yand niṅbiyn ak, am nimb yip sikoy won bap tep gakniṅ mindiy, yip kisen dam Speyn kinjenram ak yoknimimb aṅgiy niṅbiyn. ²⁵⁻²⁶ Pen Masedoniya biynimb diy, Akaya biynimb diy, Jerusalem biynimb Gor ker mindiy tap kiyk ma mindip gok kuyip opriyṅ dayak ak, miñiy ñining dand amjipiyn. ²⁷ Gos kiyk key niṅiy gipay kun

ak tep gispay. Jiwda biynimb, Krays minim tep ak dam, biynimb Jiwda mer gok kuyip aṅṅimbay rek, niṅind Gor tap kuyip ñimb gok, gunap pen ñispay.

²⁸ Pen maniy yip ñimbay kun ak, maṅgiysek dam Jerusalem ñiy, Speyn kinjenram ak amiy, nimb mindpim ak niniṅgayn. ²⁹ Ñin kun ak ap nimbip niṅen, Krays yip mindeniṅgambun rek, miñmiñ yimb giniṅgambun.

³⁰⁻³¹ Mam ay yand gok. Biyomb Jiysis Krays ker mindpim ak, Gor Kawnan yip mindpim rek, yip wasemb ay, Gor nup aṅniṅyṅ mindem, yand Jiwdiya propens amiy Jerusalem amjaken, Jiwda biynimb Krays nup gosimb ma niṅbay gok, yip timey ma giniṅgiy. Pen Gor nup aṅniṅ mindem Jerusalem amjakiy, biynimb suṅ-tep nuk gok maniy ñiniṅ gispayn ak ñen, tep gakniṅ dey, kiy yip jimñiy mindonjun. ³² Kun ak Gor gos nuk key niṅiy, yip amnoṅ aṅgek, am nimb yip tep gakniṅ mindiy amniṅgayn.

³³ Gor nimbip maṅgiysek kond mindakniṅ, jimñiy mindiy mindrep ginimimb.

16

Pol “nimb Mindpim?” Aṅgak

¹ Pen ay chin Piybiy, Senkriya biynimb kuyip Gor minim tep aṅṅimb ak, jap. Nimb mindpim ak amjakek, nup direp yimb ginimimb. ² Yip tep giniṅgamb ak, nimb Biyomb chin anup gosimb niṅbim rek, nup direp giy, tap gunap ma mindek niṅiy monmon ñinimimb. Nuk biynimb okok kuyip direp giy, yip direp giy gip.

³ Pen Akiwiyla yip, biynuk Priysiyla yip Krays nup wong jimñiy giyingipun biber ak kuyip angnimimb, “Pol nirip ‘Mindpiyr?’ angip angnimimb.” ⁴ Nind yip pikayning geyak, biber tep yand kun ak mindiy, kasin girik. Pen chirup pikayningiy angiy gos ak ma niñiy kun gerik, yip tep giy, Gor biynimb miñmon paryomb okok angñen niñbay gok kuyip tep giy gip.

⁵ Pen Gor biynimb nuk ap korip kuyipber ak nan-giy, lotiw gipay gok kunep angnimimb, “Pol nimbip ‘Mindpim?’ angip angnimimb.”

Mam tep yand Epiyniytas nup angnimimb, “Pol nip ‘Mindpan?’ angip angnimimb.” Esiya propens, Krays nup nind dak, mey bi kun ak.

⁶ Biyn Mariya nimbip kosyam kond mindyngip ak nup angnimimb, “Pol nip, ‘Mindpan?’ angip angnimimb,”

⁷ Pen bi lek lek yand niñep rek, Androniykas yip, Jiwniyas yip, kuyipmiñay angnimimb, “Pol niripmiñay, ‘Mindpiyr?’ angip angnimimb.” Kiyimiñay mey Krays nup nind der, yand kisen dinik. Yip kalambis ayak rek, kuyipmiñay kunep kalambis ayey, jimñiy mindyngipun. Pen bi Jiysis minim dand amemb gok, bi omiñal kun ak kuyip niñrep yimb gipay.

⁸ Mam tep yand Ambliyetas, Krays nup ching tep gip ak, nup angnimimb, “Pol angip, ‘Mindpan?’ angip angnimimb.” ⁹ Mam Ebanas nup angnimimb, “Pol nip, ‘Mindpan?’ angip angnimimb.” Mam kun ak chirimiñay Krays nup wong ak jimñiy gipur. Mam tep Stekiys nup kunep angnimimb, “Pol nip ‘Mindpan?’ angip angnimimb.”

10 Apeliys, Krays nup gosimb nokom ninimb ak nup angnimimb, “Pol nip, ‘Mindpan?’ anqip angnimimb.”

Biynimb Ariystobyiwlas korip ak mindpay gok kuyip angnimimb, “Pol nimbip ‘Mindpim?’ anqip angnimimb.”

11 Bi lek lek yand ninep rek, Herodiyon nup angnimimb, “Pol nip, ‘Mindpan?’ anqip angnimimb.”

Biynimb Nasiysas korip ak mindiy, Krays ker mindpay gok kuyip angnimimb, “Pol nimbip ‘Mindpim?’ anqip angnimimb.”

12 Biyn Triypana yip Triyposa yip, Biyomb chin anup gosimb ninying wong gipiy ominal ak kuyip angnimimb, “Pol niripminay, ‘Mindpiyr?’ anqip angnimimb.”

Ay tep Pesis, Biyomb chin ak nup gosimb ninying wong gip anup kunep, angnimimb “Pol nip, ‘Mindpan?’ anqip angnimimb.”

13 Bi Riwpas, Krays ker mindip ak nup angnimimb, “Pol nip ‘Mindpan?’ anqip angnimimb.” Nonim nup ak, amiy yand rek ayek “Amiy” apiyn ak nup kunep angnimimb, “Pol nip ‘Mindpan?’ anqip angnimimb.”

14 Asinkriytas, Pliygon, Hemis, Patrobas, Hemas, numam kiy yip mindpay gok, kuyip mangiysek angnimimb, “Pol nimbip, ‘Mindpim?’ anqip angnimimb.”

15 Piylologas biynuk Jiwliya yip, Nereyas nunay nuk Olyimpas yip, biynimb Gor ker mindiy kiy yip mindpay gok sek kunep angnimimb, “Pol, nimbip. ‘Mindpim?’ anqip angnimimb.”

¹⁶ Gor nup gosimb niñbim rek, penpen wasiw giying, ñin piksanimimb.

Krays biynimb nuk akniy keykey nan-gipay rek, nimbip “mindpim?” apay.

Minim Yesek Gok Ma Dinimimb

¹⁷ Mam ay sikop. Niñrep ginimimb. Biynimb gunap minim okok nimb dand apiy, biynimb Krays ker mindpay gok kuyip anğney, gos tep nind niñyak ar ak kirgiy, gos ñimbay kun ak diy, asik keykey aypay. Kun ak nimbip kunep ginimuñ rek ayip ak, minim anğniñgiy ak ma dinimimb. ¹⁸ Biynimb kun gipay gok, Biyomb chin Krays nup woñg ak gun anğiy ma gipay; kuyip key tep gip ar anep niñiy gipay. Kiyk minim sayn biynimb yimb dand aranemb anep anğiy, biynimb niñrep ma gipay gok kuyip gos timey ar kun ak ñimbay. ¹⁹ Nimb pen, Gor minim tep ak direp gem, biynimb okok mañgiysek niñbay ak, yip tep yimb gip. Pen biynimb gunap minim monmon anğniñgiy ak, ma yimb dinimimb.

²⁰ Mañ mindip. Gor Biyomb biynimb kond mindip ak, Seytan nup di talak miñgan nimbip okok ayek, kilis nuk ma mindeniñgamb.

Biyomb chin Jiysis ñin ar ak mindenimimb.

²¹ Ñi woñg yand yip jimñiy gipur, Timotiy; nimbip “Mindpim?” asap. Bi yand Liwsiyas, Jeson, Sosiypata kunep nimbip, “Mindpim?” aspay.

²² Pen yand bi Taydiyas, Pol anğek minj tikpiyn biy, kunep nimb Rom kay Krays ker mindpim gok, “Mindpim?” aspiyn.

²³ Bi Gayas, yip dam korip nuk ak ay, kond mindrep gip ak, nimbip “Mindpim?” asap. Bi

kun anep Krays ker mindpay biynimb gok angek, korip nup ak apey girep gip.

Pen bi kus kus pey ñemb Erastas yip, mam chin Kiwotas yip kunep nimbip, ‘Mindpim?’ aspiyr. ²⁴ [Nimb mangiysek Biyomb chin Jiysis Krays biynimb simb niñimb ak ñin ar nup ak mindenimimb. Tep.]

²⁵⁻²⁶ Pen Gor nup yimb ak dand aranjun. Nuk nep mey nimbip kond mindakniñ, nup chingrep giy mindeniñgambim. Jiysis minim tep kun ak nind weygiy mindyñgip; pen miñiy bi Gor minim angek gok minim nup tikyak ak misen gamb, minim tep kun ak biynimb okok kuyip per anğñimbiyn. Gor nep angek mey, biynimb miñmon okok mangiysek anğon, nup gosimb niñiy anğip rek gipay.

²⁷ Gor bi gos tipanğiy niñimb ak, chinup anğiy Jiysis Krays nup yokak rek, yimb nup ak perper nep dand aranemb. Tep.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 11 Nov 2022 from source files dated 9 Oct 2020

1491c109-3ee2-5565-9b83-06c480168547